

**JON**  
**Kamambuno Wakai Jon muno**  
**boglkwa**  
**Ka mongo yegl ende okuna**  
**ongwa**

Jon yegl dungwa, “Yesus yene God kamo wu yomba pindre ana nono mina suna moglkwa.”

Jon pirkan orkwa i yomba eremogl God Wam Yesus pre pirngi dindre ana kor aimande moraglmedi pre ka i muno boglkwa. Te Yesus kor moglkwa enge kimagl merkinde orkwa, i ama muno boglkwa. Te kunda ikine undre Yesus sikane sindre ana endi-prak mina sigegl kwa. Ba Yesus gogltre ande enge suwota mina aglike andigl ukor ongwa. Te ka tau di simboglkwa i yomba nangino mina taragl kandre ana nendre erimara ipre ka dungo yegl pangwa. Nigl ya bret ya ken-lam ya endi wain ya te sipsip sugl yomba, ka i yene pre ka simbogl di muno boglko pangwa.

Te Yesus mina kor aimande megl kwa inagl kwa ipre Jon ka giglendi dungwa.

*Ka wu yomba ongwa*

<sup>1</sup> Okuna imbo Ka i pai moglkwa. Ana Ka i God bogl moglkwa. Ana Ka i God moglkwa. <sup>2</sup> Ye okuna imbo God bogl moglkwa.

<sup>3</sup> Ye mina taragl prapra God ere yongwa, taragl kanekane ere yongwa i ye moglko keunde ere

yongwa. <sup>4</sup> Kor meglkwa ye mina yongwa ana kor-meglkwa i yomba ambuglangeno. <sup>5</sup> Ana ken i mim ormara suna ambuglange sungwa, ba mim i wu sigongonagledi orkwa manga.

<sup>6</sup> Yagl ta wu pene pi moglkwa ye God diendungo ungwa, kangiye Jon. <sup>7</sup> Ye ken ambuglange kamo i dipene endinan ana ye mina yomba prapra pirngi dinaglkwa pre ye ka-singiye yomba ungwa. <sup>8</sup> Jon yene ken ambuglange ta moglkrukwa, ba ken ambuglange i kamo ana ye dipene endina pre ungwa. <sup>9</sup> Ana ken ambuglange kaima i ambuglangesi yomba makan uglo koglkoglo tenapre ungwa.

<sup>10</sup> Ye makandle moglko ana ye mina God dumo makan koglkoglo ere yongwa ba makan yomba ye pirkanpogl sikrikwa. <sup>11</sup> Yene dumo makanmo mina ungwa. Ba yene yombama diwakai yeit-ekrikwa. <sup>12</sup> Yomba tau ye di-ingwa ana ye kangiye mina pirngi dingwa, yeglpre ye pra God nangiglma meglme dungwa. <sup>13</sup> God nangiglma i neno mano bormaino mina kugl yei kiurika te yomba ka dikogl erimere i manga te enene pirmere i manga ba God yene prumere ere i nangiglma endungwa.

<sup>14</sup> Ana Ka wu yomba pindre nono mina suna moglkwa. No ye ambuglangemo kanga. Ana ambuglange i ye suwara, Nem diendungo ungwa. Yeglpre ye wakaimo ya Ka kaima ye mina kau sungwa. Ye God Wam kaima moglkwa.

<sup>15</sup> Jon eremogl Yesus pre dinongugl endungwa, ye ka kande dindre dungwa, “Na yomba ipre dingra, na komnaiye winga ba yomba i na mokonamugl ungwa, ye okuna imbo mogltre ana mogl-

mitna ende na engrukwa.” <sup>16</sup> Ye wakaimo kausi moglko i mina no prapra ere wakai ere mundu-mundu yunga. <sup>17</sup> God lomo Moses tongwa ba ye wakaimo ya ka kaima i Yesus Krai mina ungwa. <sup>18</sup> Yomba ta God kankrikwa, ba God Wam suwara ye Nem bogl akiye miurka pre ye mina Nem ombuno dipene endungwa.

*Jon Baptais na Krai moglkriye dungwa  
(Matyu 3:1-12; Mak 1:7-8; Luk 3:15-17)*

<sup>19</sup> Jerusalem dumo suna Juda yomba eremogl pris ya Levai wagle diende ana Jon ira moglmda krapogl piryongwa. <sup>20</sup> Ye uglmange erekre dinongugl ende dungwa, “Na Krai ta moglkrikwa.”\*

<sup>21</sup> Ana ye krapegkwa, “Ene irane? Ene Elaija motno?”

Jon di ikine endungwa, “Na tamanga.”

Ana ye dingwa, “Ene Propet ta motno?”

Ye di ikine ende dungwa, “Na tamanga.”

<sup>22</sup> Ana okuwo ye dingwa, “Ene irane? Dinotn no pi diendigo umga yomba ye ene ira motnga i ka mongo ditenamga.”

<sup>23</sup> Jon eremogl propet Aisaia ka muno boglkwa i di ikine endungwa, “Makan waule suna yomba ta wiyau dungwa i na mina pai yungwa. Yaglkande pre konbo si-ake du endiyo.”☆

<sup>24</sup> Parisi wagle yomba diendingo wingwa ikra <sup>25</sup> krapogl Jon teingwa, “Ene Krai mo Elaija, mo Propet ta moglkitn ana ene sraglpre yomba baptais tene?”

---

\* **1:20:** God yomba i-ikine endinambuka pre yagl ta pinde yungwa i, Grik ka mina ye, “Krai”. ☆ **1:23:** Aisaia 40:3

<sup>26</sup> Jon di ikine ende yegl dungwa, “Na nigl mina baptais teinga, ba ene meglmara suna i yomba ta moglkwa ene pirkan erekrikwa. <sup>27</sup> Ye mokonamugl ungwa, na yomba wakai ta moglmbo kade ye kagle towo mina kan tonguma pangwa i na ta pirka sinaglka kuno erekrukwa.”

<sup>28</sup> Taragl prapra plau dungwa i Jodan Nigle koglo imbo Betani makan Jon yomba baptais ere tomara igle.

*Yesus, ye God Sipsipmo Nangigle*

<sup>29</sup> Ana enge tangina Jon kango Yesus ende ye moglmara ungwa. Ana Jon yegl dungwa, “Kaniyo, Yomba i God Sipsipmo Nangigle makandle yomba tandaglmeno koko endina pre ungwa. <sup>30</sup> Na ka dinga ikra yomba ipre mendigl digra, ‘Yomba ta na mokonamugl ungwa i mogl-mitna ende na engrukwa. Sraglpre na moglkriko ye okuna imbo moglkwa.’ <sup>31</sup> Na nana ye ira moglkwa i ta pirkanpogl sikrika, ba na mambuno ta pango wu nigl mina baptais teinga i Israel yomba meglmara igle wu pene enan kanaglkwa pre erika.”

<sup>32</sup> Ana Jon yene mambunomo dipene ende tongwa, “Na kaninga Holi Spirit kua yumugl mereyegl heven imbo ende atne undre ye mina moglkwa. <sup>33</sup> Yomba i ira moglkwa, i ta pirkan erekrika, ba God na diende nigl mina baptais to dindre ana yegl dinarkwa, “Ene kanmin Holi Spirit ende atne wu yagl ta mina ake morambuka i ye yomba Holi Spirit mina baptais tenambuka. <sup>34</sup> Na i kandre, ana ye God Wam kaima moglme dinga.

*Yesus disaipel 4 komuno pinde yungwa*

<sup>35</sup> Ana tangina Jon eremogl disaipelmo suwo bogl akiye aglke kordagl igle meglkwa. <sup>36</sup> Jon kango Yesus konbauna ende wongo ana ye dungwa, “Kaniro, i God Sipsipmo Nangigle.”

<sup>37</sup> Ye disaipelmo suwo ka i dungo pimbrika enge, ana Yesus omara mokomugl embrika. <sup>38</sup> Yesus kan ikine endungo yagl suwo i mokomugl embriko ana krapogl tongwa, “Ene aglokra moglpai etne?”

Ye dimbrika, “Rabai” (i mambuno yegl, Beke Notnga), “Ene yungu aglokra motne?”

<sup>39</sup> Ye di ikine endungwa, “Ene undre, ana kanambrika.”

Yeglpri ye endpi moglmara igle kanbriko ana ande enge mundu ye akiye igle meglko ana ande kuiya 4 klok yongwa.

<sup>40</sup> Ana Jon ka dungo pirtre, Yesus omara mokomugl embrika ikra ta Andru, ye Saimon Pita angigle. <sup>41</sup> Ana komnaiye Andru ta orkwa i, ye angigle Saimon doko kan indre ana ditongwa, “No Mesaia kan imbuglka.” (I mambuno Kraisi we dingwa.)

<sup>42</sup> Ana Andru eremogl Saimon auro yu Yesus moglmara ungo ana ye Saimon kandre dungwa, “Ene Saimon, Jon wam. Ene kangin Sipas we dinaglka.” Sipas i Aram ka mina kangiyeyeingwa, i Juda yomba kanno pangwa. Te Grik ka mina Pita.

### *Yesus eremogl Pilip ya Nataniel diyungwa*

<sup>43</sup> Ana tangina Yesus ende Galili kamun enagledi orkwa. Ye pi Pilip kan indre yegl ditongwa, “Na wimara wo.”

<sup>44</sup> Pilip, ye Betsaida taun nem, dumo igle ombugl Andru ya Pita ye kamuno yongwa. <sup>45</sup> Pilip eremogl Nataniel kandre yegl ditongwa, “Yomba ta pre Moses lo mina pepa muno boglko te propet wagle ye pre ama pepa beglko pangwa ikra no kan yunga. I Yesus ye Josep wam. Nasaret kamun nem.”

<sup>46</sup> Ana Nataniel ye ka kra yegl pogl tongwa, “Taragl wakai ta Nasaret kamun plau dinambo?”

Pilip ye di ikine ende tongwa, “Ene undre ana kano.”

<sup>47</sup> Ana Yesus kango Nataniel ye moglmara ungo ana ye pre yegl dungwa, “Kaniyo, yagl i Israel yomba kaima, ye mina suna kakimbi ta paikrukwa.”

<sup>48</sup> Nataniel kra yegl poglkwa, “Ene sraglmere na pirkan etne?”

Yesus di ikine endungwa, “Okuna imbo Pilip ene aglendi ikrukwa enge ene endi kogla mam-buno mina mogl panga enge ikra, ana na ene kankondinga.” <sup>49</sup> Nataniel di ikine endungwa, “Beke Notnga, ene God Wam, Israel yomba Kingno.”

<sup>50</sup> Ana Yesus dungwa, “Ene endi kogla mam-buno mina motngo, ene kaniye dinga ikra pre ene pirngi dinga ba kanere yeglmere okuwo taragl giglendi ama kandatnga.” <sup>51</sup> Yesus ka ta aine yegl dungwa, “Na ka kaima ene diteinga, okuwo heven audinan ana Yomba Wam mina God angelomo ende mitna pi ende atne wu erimbi ene kanaglkwa.”

## 2

*Yesus niglyoko ere i wain endungwa*

<sup>1</sup> Ande enge suwo endongo ana enge ta mina Galili dumo kande Kena kamun suna igle yaglambu suwo bogl inambrika enge plau dungo, ana Yesus mam ombugl suna igle moglkwa. <sup>2</sup> Ana Yesus ya disaipelma wagle bogl ama wiyo dingo, ye wu yaglambu bogl imbrara igle meglkwa. <sup>3</sup> Enge igle wain neingwa dundungo, ana Yesus mam pi wam ditongwa, “Wain dundungo yomba ninaglkwa ta yeikrukwa.”

<sup>4</sup> Ana Yesus di ikine endungwa, “Ambu ya, na taragl yegl ero dikro, na engena ta magl ukrukwa.”

<sup>5</sup> Ana Yesus mam eremogl nigl-kongun yomba ditongwa, “Ye taragl ta eriyu dinambere i ene pra eriyu.”

<sup>6</sup> Ana makan singala 6 magl wora bondugl yeingwa, i we Juda yomba engeno kande yongwa enge nigl kogl yei pai-pai erikwa. I suwarandi nigl 80 ya 120 lita suna morambuka, te niglmo i-suwara endimbi yumbun murki dinambuka.

<sup>7</sup> Ana Yesus yegl di nigl-kongun yomba tongwa, “Ene sin gala i prapra nigl kogl kau siyo.” Ana ye nigl kogl sin i prapra sikau singwa.

<sup>8</sup> Ana ye ditongwa, “Nigl tau kogl ipi wain sugl moglkwa yagle moglmara piyo.”

Ye dumere yegl eriko, <sup>9</sup> ana sugl moglkwa yagle nigl yoko ikra ne pruko wain kuglo wakai orkwa.\* Ana ye wain i aglokra i-wingwa i ta pirpogl sikrukwa, ba nigl-kongun yomba nigl toindingwa

---

\* **2:9:** Yesus kimagl ya diu orkwa i kamo merkinde pepa Jon mina paingwa. Ka tau igle kano: Jon 2:11; 2:23; 3:2; 4:54; 6:2; 6:14; 6:26; 9:16; 11:47; 12:18-19; 12:37.

pre ye pirkan erikwa. Ana ye eremogl ambu inambuka yagle aglendi bina ende <sup>10</sup> ana dungwa, “Yomba prapra wain wakai komuno kana yumbu sindre ana ne du eriko kade okuwo wain kinde te-te erikwa. Ba ene wain wakai tawa teke yei pandigltre erme i-pene endingwa.”

<sup>11</sup> Yesus kimagl koragle kaima Kena kamun Galili dumo kande suna igle orkwa, i ye yombu-glomo ombuno dungo disaipelma wagle kandre ana Yesus pirngi dingwa.

<sup>12</sup> Ana okuwo Yesus ya mam ya angiglma ya te disaipelma bogl akiye end-ime Kaperneam kamun eingwa. Ye ande enge suwomta igle meglkwa.

*God holi yungumo mina yomba maket ere meglko Yesus simenda endungwa*

*(Matyu 21:12-13; Mak 11:15-17; Luk 19:45-46)*

<sup>13</sup> Juda yomba Pasova kaiya mokna bir ni-naglkwa enge kande magl orko. Yesus ende imbo Jerusalem ongwa. <sup>14</sup> Ana ye kango God holi yungumo mina sunakra yomba eremogl bulmakau, ya sipsip ya te kua yumugl maket pandiglkwa. Ana yomba tau botno mina amedi mogl ye moni topo ere te imboriya ende meglkwa.

<sup>15</sup> Yegl eriko ana ye baklain ta indre ake kumbuyambsi kumba ende, ana sipsip ya bulmakau te yomba ikra pra God holi yungumo mina simenda ende, ana yomba moni topo ere imboriya ende meglkwa ikra sitoindindre ana botno ake i-yake tongwa. <sup>16</sup> Ana ye ka giglendi di kua yumugl maket erikwa yomba tongwa, “Ene taragl kanekane i prapra imenda piyo! Na



Nina yungumo i ene maket yungu mereyegl en-dekriyo!”

<sup>17</sup> Yesus disaipelma wagle ye mambuno yegl orkwa i kandre, ana kamambuno pepa mina muno ta beglko pangwa ikra pirkwa. Ana ka i yegl: ‘Ene yungun holi na wakai kaima pirtre ana wakai yenambedi kongunmo erika i donga bauglo mereyegl na mina suna dongwa.’<sup>☆</sup>

<sup>18</sup> Ana Juda yomba kande wagle krapogl Yesus teingwa, “Ene sragl kimagl ertre no ombuno dimin ana ene yombutn yegl pangwa pamiwodi no kanamne?”

<sup>19</sup> Ana Yesus yegl di ikine ende tongwa, “God holi yungumo i ene siterke atne endimbi ana ande enge suwota mina na aglkekor kei bondraglka.”

<sup>20</sup> Ana Juda yomba yegl di ikine endingwa, “Yawagle, God holi yungumo i kei eingo buglayungu 46 orko ana kei dundingwa, ba ene ande enge suwota mina yungu i kei bondragle dinga.” <sup>21</sup> Ba Yesus yene nangiye ipre God holi yungumo we dungwa. <sup>22</sup> Okuwo Yesus gogltre andigl ukor ongo, ye disaipelma wagle okuna kana ka ditongwa ikra poglodi pir ikine endingwa. Ana ye kamambuno pepa mina okuna beglko pangwa ikra ya Yesus ka okuna dungwa i pirngi dingwa.

*Yomba embriye mambunono i Yesus kan-kondungwa*

<sup>23</sup> Pasova enge kande mina, Yesus eremogl Jerusalem suna moglkwa, ana yomba merkinde Yesus kimagl orkwa i kandre ana ye kangiye

---

<sup>☆</sup> **2:17:** Buk Song 69:9

pirngi dingwa. <sup>24</sup> Ba Yesus yene pirngidi yomba i tekrukwa, sraglpre ye eremogl yomba i mambunono kan-kondungwa. <sup>25</sup> Yeglpre yomba ta eremogl Yesus ditendre ye mambunono yegl we ta dikrambuka, sraglpre Yesus yene yomba nomano mina taragl suna yongwa i kan-kondungwa.

### 3

#### *Yesus ya Nikodimas denbi dimbrika*

<sup>1</sup> Juda yagl kande ta moglkwa kangiyе Nikodimas, ye Parisi ta moglkwa. <sup>2</sup> Ye enduwer undre, Yesus moglmara yegl dungwa, “Beke Notnga, no pirkan ounga ene ka beke notnga ta God di endungo unga, ene kimagl etnere yegl yomba ta erekragl kwa, ba God eremogl yomba ta mina mogl tenan ye pra kimagl etnere yegl erambuka.”

<sup>3</sup> Yesus yegl di ikine endungwa, “Na ka kaima ene di teinga, yomba ta ye kor kugl yeikrimbi ukor pikran ye God kingdomo ta kankrambuka.”

<sup>4</sup> Nikodimas aglkekor Yesus diprukwa, “Yomba yake kondungwa sraglmere mam aglkekor kugl yenambe? Kaima yene ye ende ikine mam dane suna kra enan mam aglkekor ta kugl yeikrambuka!”

<sup>5</sup> Yesus ka mongo ditongwa, “Na ka kaima diteinga, yomba ta nigl ya Holi Spirit mina ta kugl yeikrambuka, ye God kingdomo mina suna ta pikrambuka. <sup>6</sup> Yomba nangino mina kugl yeingwa i yomba yoko, ba Holi Spirit kugl yongwa i spirit. <sup>7</sup> Na ka yegl dimara i ene sipuglo dikro, ‘Ene kaima aglke kordagl kugl yenaglkwa.’ <sup>8</sup> Ir yene mange ta ena prumere ongwa, kugla dungo ene pirkwa, ba mange umara mo omara i ene ta

kankrikwa. Yomba prapra Holi Spirit mina kugl yongwa i ir ormere kuno yegl.”

<sup>9</sup> Nikodimas krapoglkwa, “Taragl i srambre ere plau dinambe?”

<sup>10</sup> Yesus yegl di ikine endungwa, “Ene Israel yomba ka beke tenga yomba kande ta motnga, ba taragl i ene pirkitno? <sup>11</sup> Na ka kaima di ene teinga, no taragl punga pre dindre te taragl kamga i ditomga. Ba no ka dumga i ene kaima ta pir ina kiurikwa. <sup>12</sup> Makandle taragl na diteinga i ene ta pirngi dikrikwa, ana heven taragl i pre na dimbo ene sraglmere na pirngi dinaglme? <sup>13</sup> Ana yomba suwarata ende heven pikrikwa, ba Yomba Wam suwara ye heven mogltre ana ende atne unywa. <sup>14</sup> Makan waule suna Moses eremogl toki ake mitna endungwa, kuno yeglmere Yomba Wam ake mitna endinaglkwa. <sup>15</sup> Yegl eran yomba prapra ye wedi pirngi dinaglkwa, ye kor aimande moraglkwa inaglkwa.

<sup>16</sup> “God eremogl makan yomba prapra wakai-yene kangwa pre, ye Wam suwara kaima tongwa. Yomba ye wedi pirngi dinaglkwa ta gogkraglkwa, ba kor aimande moraglkwa inaglkwa. <sup>17</sup> God Wam di manginagle endungwa i yomba mambunono yumbu sinambuka pre ta manga, ba ye yomba ere-ina pre unywa. <sup>18</sup> Yomba ta ye wedi pirngi dinambuka ye kot erekrambuka, ba ye wedi pirngi dikrambuka kot mina yange sungwa. Sraglpre God Wam suwara kaima kangiye mina ye wedi pirngi dikrikwa. <sup>19</sup> Ana kot eraglkwa mambuno i yegl, ambuglange ende makandle wu kondungwa, ba yomba

ambuglange wakai kanamna payondi kondo mim wakai kanigwa, sraglpre ye mambuno kinde ere meglkwa. <sup>20</sup> Yomba prapra mambuno kinde erikwa, ye ken ambuglange kankinde yei, ana ye mambunono kinde wu pene pi dinambedi pre kundugl gogl ambuglange mina ukrikwa. <sup>21</sup> Ba yomba mambuno wakai kaima erikwa ye ken ambuglange mina ende suna wingwa, ana ambuglange i meglmara sinan, ye taragl erikura i ana God kamo dumere erikwa pre yomba kanaglkwa.”

*Jon Baptais Yesus pre dipene endungwa*

<sup>22</sup> I mokomugl Yesus ya disaipelma wagle ende pi Judia dumo kande pindre enge tau ye bogl igle mogltre, ana yomba baptais ere teingwa. <sup>23</sup> Aionon dumo i Selim kamun magl, igle nigl suwarata wongwa ba niglmo mere moglkwa pre, Jon ama yomba ye moglmara baptais era pre wingo ye baptais ere tongwa. <sup>24</sup> (Enge i Jon kane singo paikrukwa enge.) <sup>25</sup> Juda yagl ta yongo te Jon disaipelmo tau yeingo nigl pai wu wakai eingwa mambuno i pre tengramo dingwa. <sup>26</sup> Ana Jon disaipelma tau ende wu Jon moglmara yegl dingwa, “Beke Notnga, yagl ta ene bogl akiye Jodan Nigle koglo imbo miurko ana ene ye pre kamo dingra, yaglmo i eremogl yomba baptais erete moglko ana yomba merkinde ende ye moglmara eingwa.”

<sup>27</sup> Ana Jon yegl di ikine endungwa, “Neno kande heven moglkwa imbo taragl ta yomba tekran ana yomba ye yene ta ikrambuka. <sup>28</sup> Na ka i okuna kana dinga ene pirkondingwa, ‘Na Kraisa ta manga. Ba God eremogl ye pre singiye po diendungo na

okuna kana winga.’ <sup>29</sup> Ba yagl ta ambu inan ana ambu i ye embiye moglkwa. Yaglmo i yomba ta yeinongwa ye magl mogltre ka dungwa i pirtre ana pir gun yongwa yeglmere na ama gun pond yeinga i pra kuno orkwa. <sup>30</sup> Ye kangiye pai mitna endinan ana na kangina wu atne enambuka.

<sup>31</sup> “Ana yomba ta kamun mitna ende atne ungwa i ye mogl-mitna ende taragl prapra engrukwa. Yomba ta makandle moglkwa i makan yomba, ana ka dinambuka i makandle yomba ka dimere yegl dinambuka. Ana yomba ta heven unambuka i mogl-mitna ende taragl prapra engrukwa. <sup>32</sup> Ye taragl kangwa ya te prukwa i kra dipene ende tongwa, ba yomba eremogl ye kamo i pir ikrikwa. <sup>33</sup> Ba yomba ta Yesus kamo pir inan ana embriye igle mina ye pirngi dungwa, i yegl, ‘God ka kaima dungwa.’ <sup>34</sup> Te God di endungwa yomba ta ungwa i ye God kamo dungwa, sragl-pre God eremogl Holi Spirit tongo yomba i mina mogl kau sungwa. <sup>35</sup> Nem eremogl yene Wam kanwakai yendre, ana taragl prapra i Wam ongo mina yongwa. <sup>36</sup> Yomba ta God Wam pre pirngi dimbi, ana kor aimande moraglkwa i inaglkwa. Ba yomba ta God Wam kamo ta pirngi dikrimbi ana kor aimande moraglkwa kankraglkwa. Sragl-pre God dem kumbrukwa yomba i mina pangwa.”

## 4

### *Samaria ambu ta Yesus bogl ka dimbrika*

<sup>1</sup> Parisi wagle yegl pirkwa: Yesus kongun ere ende okuna pindre disaipel mere baptais erete ana Jon orkwa i engrukwa. <sup>2</sup> Ba Yesus

ye yene yomba ta kaima baptais ere tekrukwa, ye disaipelma wagle keunde yomba baptais ere teingwa. <sup>3</sup> Ana Yesus eremogl ye ka dingwa i pirtre, ye Judia makan kindekondo aglke ende ikine Galili enagledi pre ongwa.

<sup>4</sup> Ba ye du ende pi Samaria dumo suna ongwa, <sup>5</sup> Samaria dumo angai ta Sikar we dimara igle ungwa. Ana igle Jekop okuna kana makan ikine wam Josep tongwa ikra Sikar kamun mangigl yongwa. <sup>6</sup> Ana Yesus konbauna eglke ungwa kinde orko ana ande kuiya 12 klok yongo Jekop niglmaugl pere yomara igle kra bina ye amedi mogl prukwa.

<sup>7</sup> Ana Samaria ambu ta nigl koragledi pre ungo, ana Yesus eremogl yegl di ambumo i tongwa, “Ene nigl ta kogl natn ninaglo mo?” <sup>8</sup> (Yene disaipelma wagle kaiya mokna topo era pre ende taun suna eingwa.)

<sup>9</sup> Ana Samaria ambu ikra di Yesus tongwa, “Ene Juda yagl ta motngo te na Samaria ambu pere moglka. Sraglpre ene nigl kogl naro ninagla dine? Ene pro, Juda yomba ya te Samaria yomba ye kaiya mokna yaundo suwara nekrikwa mam-buno pangwa.”

<sup>10</sup> Ana Yesus di ikine ende ambumo i tongwa, “Ana God wakai ere sragl tongwa i ene pirkan etn, ana yagl nigl pre krapoglkwa i ene pirkan eratnga, ana ene ye krapogl temin kade, ana nigl kor aimande meglkwa i ye ene tenambuka.”

<sup>11</sup> Ana ambumo i dungwa, “Yagl kande, ene nigl koratnga baket ta ake moglkitnga, ana niglmaugl i mur atne ime yongwa. Ba ene niglkor aimande

yange pangwa i aglokra koratne? <sup>12</sup> Ana no kowano Jekop niglmaugl i waugl no norkwa, ana ye yene ya, nangiglma ya, te sipsip, meme, bulmakau, ye niglmo suwara igle neingwa. Ana ene mogl-mitna ende Jekop engitn kana?”

<sup>13</sup> Ana Yesus yegl di ikine endungwa, “Yomba prapra nigl igle ninaglkwa, ye aglke kordagl nigl goraglkwa. <sup>14</sup> Ba yomba ta na nigl tenaglka i ninan ana nigl aglketa goglkrambuka. Tamanga. Na nigl tenaglka i ye mina suna aimande yange paimogl enan ana ye kor aimande meglkwa inambuka.”

<sup>15</sup> Ana ambumo di Yesus tongwa, “Yagl kande, niglmo i na naro. Yegl etn na okuwo nigl pre ta goglkre ana aglke aglke wu koglkraglka.”

<sup>16</sup> Ana Yesus yegl di ambumo tongwa, “Ene ende pi win agle di-indre ana ende ikine wo.”

<sup>17</sup> Ana ambumo yegl di ikine endungwa, “Na wina ta moglkrukwa.”

Ana Yesus di ikine endungwa, “Ene wina ta moglkrume dinga i ka kaima dinga. <sup>18</sup> Ana ene okuna yagl 5 engra ana erme yagl ta bogl miurka i ene win kaima ta manga. I ene ka kaima dinatnga.”

<sup>19</sup> Ana ambumo yegl dungwa, “Yagl kande, na kaninga ene propet ta motnga. <sup>20</sup> Na kowana awana Samaria yomba ye makan muglo igle\* God dembiye karaugl ere te-te erikwa, ba Juda yomba ene eremogl Jerusalem dumo suwara igle keunde God dembiye karaugl ere tenamniwo dingwa.”

---

\* **4:20:** Ambu kamun muglo iwe dungwa, i Gerisim muglo, i Samaria distrik yongwa. Samaria yomba ende kamun muglo igle pindre ana lotu kande ere ere erikwa. Ka dinongugl endungwa i Luk 9:53 mina kano.

<sup>21</sup> Yesus yegl di ambumo tongwa, “Ambu ya, ene na ka dinga i pirngi do, okuwo enge ta plau dinan kade ana makan muglo i mo Jerusalem suna i keunde ta yomba ye nina dembiye karaugl ere te moglkragl kwa. <sup>22</sup> Ene Samaria yomba eremogl yomba ira dembiye karaugl ere teingwa i ene ta pirpogl sikrikwa. Ba no Juda wagle yomba ta dembiye karaugl ere tomga i no nono pirkan ounge. Sraglpre, yomba ere-ingwa mambuno i no Juda mina pangwa. <sup>23</sup> Ba enge ta plau dina orkwa ikra, ana erme wu pene ongwa. Yomba God dembiye kaima karaugl ere tenaglkwa engemo, ana ye Holi Spirit yombuglomo mina ya te mambuno wakai kaima mina nina dembiye sitembi, ana yomba yeglmere nina dembiye karaugl ere tenaglkwa, ye wakai pirambuka. <sup>24</sup> God ye Spirit moglkwa, yomba ye dembiye karaugl ere tenaglkwa i yene spiritmo mina ya mambuno kaima mina dembiye karaugl ere tenaglkwa.”†

<sup>25</sup> Ana ambumo yegl dungwa, “Na pirka Mesaia kangiye ta Krai we dingwa i unambuka, ana ye unambuka enge taragl prapra dipene ende norambuka.” <sup>26</sup> Ana Yesus dipene ende tongwa, “I na moglka, erme ene bogl ka dimoglkwa.”

*Yesus disaipelma wagle ende ikine ye moglmara wingwa*

<sup>27</sup> Yegl dimiurko, ana disaipelma wagle ende ikine undre kaningo, ana ye ambu ta bogl ka denbi dimiurko ye kandre waikiglkwa. Ana ene

---

† 4:24: “Yene spiritmo mina” yomba tau ka i yegl yake tengwa, “Holi Spirit yombuglo mina”.



sraglpre ambu i bogl denbi dine? Ye ka yegl ta di Yesus tekrikwa, te ambuno i ama ka ta ditekrikwa.

<sup>28</sup> Ana ambumo nigl baket kindekondo ende ikine taun pindre ana ka yegl di yomba tongwa, <sup>29</sup> “Yagl ta na taragl prapra erika ikra dipene endungwa, ana ene kanaglma wiyo. Ye Kraisa ta moran pre wa?” <sup>30</sup> Yegl dungo ana ye taun kondo ende wu Yesus moglmara wingwa.

<sup>31</sup> Enge igle disaipel wagle yegl di Yesus teingwa, “Beke Notnga, kaiya mokna ta no.”

<sup>32</sup> Ba ye di ikine endungwa, “Na kaiya mokna ninaglka yongwa i ene ta pirkan erekrikwa.”

<sup>33</sup> Yegl dungo, disaipel wagle yene di imboriya ende dingwa, “Yomba tau kaiya moknamo item kana?”

<sup>34</sup> Ana Yesus eremogl disaipel wagle ditongwa, “Na kaiya moknana, i na diendungwa yagle prumere ertre, ana na kongunmo ero di narkwa i ere kondinaglka. <sup>35</sup> Ene kanno yegl dingwa, ‘No kaiya mokna sinamga i ba 4 pradinan.’ Ba na ene ditenaglka, kaiya mokna pamara dumo i ene wakai ere kandime diyo, ikra mongo de kondungwa, ana ene uraglkwa mereyegl pangwa.

<sup>36</sup> Ana kaiya mokna simakai singwa yomba topomo indre, te kor aimande moraglkwa pre ama ye kaiya mokna simakai sungwa. Yegl eran ana ereyaglkwa yomba ya te simakai sungwa yomba suwo-akiye gun pond yenambrika. <sup>37</sup> Ka dingwa i kaima, yomba ta taragl ereyaran ana yomba ta kaiya mokna sinambuka. <sup>38</sup> Na ene diendinga i ene pi kaiya mokna ta ere yaglkrimara igle siyo, ana yomba kongun yoko ere nangino

giugogl ere yaglmara igle ene pi kaiya mokna yoko siyo.”

*Samaria yomba merkinde Yesus pirngi dingwa*

<sup>39</sup> Samaria yomba merkinde taun igle meglmara ambumo ka yegl dungwa, “Na taragl okuna erimere ikra prapra dipogl narkwa.” Ana Samaria yomba i pirtre Yesus pirngi dingwa. <sup>40</sup> Okuwo Samaria yomba Yesus moglmara undre ana ye bogl akiye moramnedi krapogl teingo, ana Yesus ande enge suwo igle moglkwa. <sup>41</sup> Ana yomba merkinde Yesus ka dungwa i pirtre ana pirngi dingwa.

<sup>42</sup> Ana ye ambu i diteingwa, “Ene ka dinotnga i pre erme no ta pirngi dikunga, sraglpre erme nono ye dra mina dungo punga i pre, no pirkan ouna. Yagle i kaima yene dumo koglkoglo yomba prapra ikine endinambuka.”

*King kongunmo yomba ta wam kinde sungo Yesus erewakai orkwa*

<sup>43</sup> Yesus ande enge suwo Samaria yomba bogl mogltre ana ende Galili kamun enapre ongwa. <sup>44</sup> Yesus ka yegl dipene endungwa, “Propet ta yene makanmo mina moran ana ye kangiye paikrambuka.” <sup>45</sup> Ana ye ende Galili dumo ongo, yomba ye gunyei diwakai yei teingwa, sraglpre, Pasova enge kande mina ye prapra Jerusalem pindre ana Yesus taragl prapra orko kanigwa ikra pre yegl erikwa.

<sup>46</sup> Ana Yesus aglke kordagl ende ikine Kena dumo kande Galili kamun suna ongwa. Igle ye okuna niglkor orko wu wain ongwa. Ana igle king kongunmo yomba ta wam kinde sungo Kaperneam kamun paimoglkwa. <sup>47</sup> Ana yaglmo

pruko, Yesus ye Judia kamun kondo ende Galili ume dingo, ye wu Yesus moglmara ungwa. Yaglmo prukwa Yesus ende Kaperneam pindre ana ye wam kinde sungo gorambedi ere pangwa i erewakai ere tenambedi pre yana dungwa.

<sup>48</sup> Ana Yesus ditongwa, “Ene kimagl kanekane ta kankrimbi, ene ta pirngi dikraglkwa.”

<sup>49</sup> Ana king kimbirmonem yegl di Yesus tongwa, “Yagl kande, na wana gogl dinambiwo ene onglandi wo.”

<sup>50</sup> Ana Yesus di ikine endungwa, “Ene ende po, wan ukor ongwa.”

Ana yaglmo i Yesus kamo pirngi dindre endongwa. <sup>51</sup> Ana king kimbirmonem kande ende yungumugl ena pre konbauna bange pi moglko, ye nigl-kongunmo yomba ka ta yundre diteingwa, “Ene wan kindemo argan orko yoko moglkwa.”

<sup>52</sup> Ana ye krapoglte ande kuiya sragl mina ye wam kindemo argan orme dungo, ana ye di ikine endingwa, “Enduwe 1 klok mina pokndungo wan kindemo argan orkwa.” <sup>53</sup> Ana nem pir ikine endungwa, enduwe ande kuiya igle mina Yesus ka ditongwa, “Ene wan kor-moglkwa.” Ana king kimbirmonem ikra, ya yombama yungugl meglkwa i kra prapra Yesus wedi pirngi dingwa.

<sup>54</sup> Yesus eremogl Judia kamun kondo ende Galili undre ana kimagl i orko, ana wu suwo ongwa.

## 5

*Betsaida nigl ponubun igle Yesus eremoglyagl ta erewakai orkwa*

<sup>1</sup> Enge i mokomugl, Juda yomba God dembiye siteingwa enge kande ta plau dungo ana Yesus

endpi Jerusalem ongwa. <sup>2</sup> Jerusalem igle togl kande ta pamara sipsip imenda suna erimara igle ponubun ta moglkwa, i Aram kanno mina Betsaida we dingwa.\* Nigle bina igle mogl pir-pir erikwa angai dumo 5 yongwa. <sup>3</sup> Ana yomba merkinde kinde sungo ye dumo igle meglkwa, i yomba ongumutno mim orkwa, ya te katno kinde orkwa ya te yombutno kembir sungwa ye nigl i mong sinambedi pre sugl kanmeglkwa. <sup>4</sup> Sraglpre, enge suwara di Yaglkande angelomo ende nigle igle suna pindre nigl kunugo ana pembigl dungo, kinde sungwa yomba komnaiye ta ende nigle atne eingwa, ana ye kindeno i argan ere-ere orkwa.† <sup>5</sup> Yagl ta igle moglkwa, ye kindemo i aimande si paimogl ongo ana buglayungu 38 orkwa. <sup>6</sup> Ana yaglmo i dumo igle paimoglko Yesus kandre, ana ye prukwa, yagl i kindemo enge olto si pai moglkwa, ipre Yesus krapogl tongwa, “Ene kinden argan eran wakai moragledi pitno?”

<sup>7</sup> Ana kinde sungwa yagle yegl di ikine endungwa, “Yaglkande, nigl i pembigl dungwa enge, yomba ta igle mogl na akepledi nigle endinaglkwa ta moglkriko, ana na ende nigle enagledi eriko yomba tau onglandi ende nigle eingwa.”

<sup>8</sup> Yesus yegl di yagl i tongwa, “Ene andiglo! Kungutn ake indre ana konbauna endpo.” <sup>9</sup> Ana yagl i kindemo tambre yene argan orko, ye kunglmo akepere indre ana konbo endongwa.

---

\* **5:2:** Erme pirpogl singwa yomba tau, ye maugl nigl i kangiye Betsaida wedi pirkwa. † **5:4:** Erme pirpogl singwa yomba tau yegl pirkwa, epigl 4 Jon yene muno boglkrukwa ba yomba ta okuwo muno boglme dingwa.

Ana enge i Sabat enge taragl i plau dungwa.  
<sup>10</sup> Yeglpre Juda yomba kande wagle ka yegl di yagle argan orkwa ikra teingwa, “Erme Sabat enge yongwa, nono lono mane dumara ene piryei kungutn ake yunga.”

<sup>11</sup> Ba yagl i di ikine endungwa, “Yagl ta na erewakai orkwa yagle i yegl dinarkwa, ‘Ene kungutn pere indre ana konbo endpo dungwa.’ ”

<sup>12</sup> Ana ye krapogl teingwa, “Yagl ira ene dite, kungutn indre ana konbauna endpo dume?”

<sup>13</sup> Ana yagl kindemo argan orkwa yagle ikra yomba ira ere tongwa, i ye ta pirkan erekrukwa. Sraglpre, yomba igle merkinde meglmara Yesus ende suna pi kolamala ere endongwa.

<sup>14</sup> Ana enge tau endongo okuwo yaglmo i God holi yungumo mina moglko Yesus kandre ye ditongwa, “Kano, ene kordagl wu wakai kaima enga, ipre ene tandaglme aglketa erekro, ta etn, taragl kinde kaima ene mina plau dinambuka.”

<sup>15</sup> Ana yaglmo i ende pindre, Juda yagl kande wagle ditongwa, “Na erewakai orkwa ikra Yesus orkwa pangwa.”

### *Yomba Wam mina kor-meglkwa inaglkwa*

<sup>16</sup> Ana mambuno yegl ipre ye mambuno bogl Yesus eresi tenamnedi pirkwa. Sraglpre, Sabat enge yomba kinde sungwa erewakai orkwa.

<sup>17</sup> Ana Yesus yegl di ikine ende ye tongwa, “Na Nina kongun engenge ere wu erme igle ungwa, ipre na ama kongun ormere yegl erika.” <sup>18</sup> Ka yegl dumara i ana Juda yagl kande wagle Yesus sigoramnedi ningadi pirkwa, i Sabat lo dumara ye ka sendungwa i keunde ta manga, ama God pre

nana Nina we dungwa. Ana dumara i yene ere ipi God bogl kokunkuno endungwa.

*God Wam kongun erambuka pre kangiyе kande pangwa*

<sup>19</sup> Yesus ka mongo ditongwa, “Na ka kaima ene diteinga, ana ye Wam yene prumere taragl ta erekrambuka. Ye Nem taragl ta orko kangwa i keunde erambuka. Sraglpre, Nem taragl kanekane ta orkwa i Wam ama orkwa. <sup>20</sup> Ana Nem eremogl Wam kanwakai yendre, ana yene taragl kanekane ta orkwa i Wam ombuno ditongwa. Kaima, ye ama Wam taragl kande kaima erambuka pre ombunodi tenan ana ye taragl pond kaima eran ene prapra kandre alagl sinaglkwa. <sup>21</sup> Ana Nem eremogl yomba geglkwa ere-ikor ende, ana kor-moraglkwa tongwa, ormere yeglmere, ana Wam kor-moraglkwa i yomba ta tenagledi prukwa mere tongwa. <sup>22</sup> Ipre, Nem yene ka-tange yomba ta tekrambuka. Ba yomba ka-tange tenaglkwa kongun i prapra Wam te kondungwa. <sup>23</sup> Ipre ana yomba prapra Nem kangiyе dembiyesi teimere kuno yegl ombugl Wam kangiyе dembiyesi tenaglkwa. Ana yomba ta ye Wam kangiyе dembiyesi tekraglkwa i ana Nem ye diendungo ungwa yagle ama kangiyе ta dembiyesi tekraglkwa.

<sup>24</sup> “Na ka kaima ene diteinga, yomba ta na kanna i pirtre ana ye na diendungo wingwa yagle i pirngi dimbi, ana ye kor aimande moraglkwa inaglkwa. Ye ka-tange tekrambuka i pre geglkwa mina kindekondo ana kor-moraglkwa. <sup>25</sup> Na ka kaima di ene teinga, enge ta unagledi orkwa, i

erme wu kondungwa, enge i yomba geglkwa ana God Wam kamo piraglkwa. Ana yomba ta ka i piran kande ye kor-moraglkwa i inaglkwa. <sup>26</sup> Ana kor-meglkwa mambuno i Neno kande yene mina pangwa, te ye yombuglomo i Wam tekondungwa pre kor-meglkwa mambuno i Wam yene mina ama pangwa. <sup>27</sup> Ana ye ka-tange yomba tenambuka pre yombuglomo i Wam tekondungwa. Sraglpre, ye Yomba Wam moglkwa.

<sup>28</sup> “Ka ipre ene sipuglo dikriyo, enge ta unan ana yomba geglkwa mauglno mina paingwa ye eremogl Yesus nungomo embriye pirtre, <sup>29</sup> ana ye mauglno mina ende menda wimbi ana tau mambuno wakai erikwa i andigl ukor pindre kor-moraglkwa, te tau mambuno kinde erikwa andigl ukor pindre ana topono kinde inaglkwa.

### *Yesus pre dipene endingwa*

<sup>30</sup> “Nana pirmere taragl ta erekraglka, na ka ta dinga i God yene dinarumere i keme na yumbu singa, i kuno orkwa, sraglpre, nana pirka yeglmere eragledi ta erekrika, ba na diendungo winga yagle ye prumere i eraglka. <sup>31</sup> Ana na nana kongun erika ya te embriyena ipre dimbo, ana yomba ta pirmbi na kaima dinedi ta pirkraglka.‡ <sup>32</sup> Ba yomba ta igle moglkwa.§ Ye ombugl na kongun erika ya embriyena i dipene endinambuka, ana na pirka ye na pre ka dipene endinambuka i kaima yene dinambuka.

<sup>33</sup> “Ene okuna kakep yomba di Jon moglmara endigo ana ye ka kaima ipre dipene endungwa.

---

‡ 5:31: Ka i Lo 19:15 mina kano. § 5:32: “Ba yomba ta igle moglkwa” i God pre, Yesus ye dungwa.

<sup>34</sup> Ana yomba ka boglo kuraglkwa i na ta pirkrika, ba na ka yegl diga i ene wakai moraglkwa. <sup>35</sup> Jon ken-lam mereyegl mogltre, ana de ambuglangesi yomba tongo, ana enge sungunagle ta ye ambuglangemo i ene indre gun yeingwa.

<sup>36</sup> “Ba na kongun erimere Jon ka boglo kugl dipene endungwa, i kandekinde pai Jon kamo i engre tongwa, Nina kongun ero diendumere i ere kondimbo ana na kongun eraglkwa i embriye kandre, ana Nem kaima diendungo ungwa pamiwodi yomba kanaglkwa, <sup>37</sup> te Nina ye na diendungo winga, na mina ye yene ka dinongugl endungwa. Ana ene ye nungo embriye ta pirkre te ye gumadra ta kankrikwa. <sup>38</sup> Ana ye kamo ama ene mina suna yeikrukwa; sraglpre, na diendungo winga yomba ikra ene pirngi dikrikwa.\*\* <sup>39</sup> Ana ka okuna muno beglko pepa mina pangwa i ene prapra giglendi kere pirkwa. Sraglpre, ka i mina ene kor aimande meglkwa i inamunedi pirkwa. Ba ka okuna beglkwa pepa mina pangwa ikra na pre dungwa. <sup>40</sup> Ene ende na mina undre ana kor aimande meglkwa ina kiurikwa.

<sup>41</sup> “Yomba na dembina sinaglmedi pre pirkrika. <sup>42</sup> Ba na ene pirkan erika, God wakai kanigwa mambuno i ene nomano suna pai moglkrukwa.†† <sup>43</sup> Ana na Nina kangiye mina winga, ene na di ikrikwa, ba yomba kangiye pangwa ta unan ene ye di-inaglkwa. <sup>44</sup> Ana ene mina kangino kande dembiyesi imboriya endinamnedi pirkwa ba God

---

\*\* 5:38: “Na diendungo winga” i Yesus yene pre dungwa.

†† 5:42: Yomba tau ka i yegl yake teingwa, “God wakaimo ene nomano mina paikrukwa.”



suwara mina dembino si tongwa i ene inaki-urikwa. Sragl yegl erikwa ipre ana ene na srambre ere pirngi dinaglme?

<sup>45</sup> “Na Nina moglmara i ene ta na ka-tange no-rambedi pirkriyo. Ta manga. Ene ka-tange tenambuka i Moses, sraglpre ene Moses no akeple dinambedi ningadi pirkwa. <sup>46</sup> Ba ene Moses kaima pirngi dima daglma ana ene na ama pirngi dinagl kwa, sraglpre, na pre ye pepa muno bogl kwa. <sup>47</sup> Ba ye ka muno bogl kwa ikra ene ta pirngi dikrikwa, ana ene sraglmere na ka diga i pirngi dinaglme?”

## 6

### *Yomba 5,000 Yesus kaiya mokna tongwa (Matyu 14:13-21; Mak 6:30-44; Luk 9:10-17)*

<sup>1</sup> Yesus ka di kondo okuwo ye Galili Niglmong sipraksi ende koglo imbo ongwa, ana niglmo mong i kangiye ta Taiberias. <sup>2</sup> Ana yomba merkinde Yesus omara mokomugl eingwa, sraglpre yomba kinde sungwa Yesus erewakai ere tongo, ye diu orkwa kanigwa ikra pre eingwa. <sup>3</sup> Ana Yesus ende egli kamun muglo ta ongwa. Ana igle yene disaipelma wagle bogl akiye amedi megl kwa. <sup>4</sup> Ana Juda yomba Pasova ne-ne erikwa engeno i ende magl ungwa.

<sup>5</sup> Enge igle Yesus kangwa yomba merkinde ende ye moglmara wingo, ana ye di Pilip tongwa, “Nono aglomere bret topo ertre ana yomba i tomuno ye prapra neimbi kuno erambe?” <sup>6</sup> Yesus eremogl Pilip ta eran kanagledi pre yegl dungwa, ba Yesus

sragl taragl erambuka i yene nomane mina pango pirkondungwa.

<sup>7</sup> Ana Pilip di ikine endungwa, “Nono ba 8 kongun ere topomo ingwa i ende bret topo oun kade ana yomba prapra ye kuri-kuridi neimbi ta kuno erekrambuka.”

<sup>8</sup> Ye disaipelma wagle suwarata kangiyeye Andru, ye Saimon Pita angigle, yegl dungwa, <sup>9</sup> “Yagl gak ta yawagle moglkwa ye bret bali 5 ya te fis kembra suwo yei moglkwa. Ba yomba prapra i neimbi kuno ta erekrambuka.”

<sup>10</sup> Ana Yesus eremogl disaipelma wagle ditongwa, “Yomba ditembi kugl merkinde moglmara iro amediyondo.” Ana yomba prapra amedingo, yagl nambano 5,000 mereyegl meglkwa. <sup>11</sup> Yesus bret ake indre God diwakai yeite, ana yumbusi yomba amedi meglkwa i tongwa. Te ye ombugl fis indre kuno yegl orko, ana yomba prapra ye merkinde ninamnedi pirmere neingo kuno orkwa.

<sup>12</sup> Enge igle yomba prapra neingwa kuno orko, Yesus yegl di disaipelma wagle tongwa, “Ikinde tau yoko moglkwa i ene gande makai siyo, nono diurkwa suwarata akesi dinamuniwo.” <sup>13</sup> Yegl dungo ye bret 5 ikra mina yomba prapra neingwa kuno orko, tau yoko yongwa ya diurkwa gande makai sindre ana basket 12 gre kau singwa.

<sup>14</sup> Ana Yesus kimagl orkwa i yomba kandre yegl dingwa, “Kaima yene, ye propet ta ende makandle unambe dingwa ikra ungwa.” <sup>15</sup> Ana Yesus pirkan orkwa, yomba undre yombuglo ere Yesus king morambedi eraglkwa mereyegl pango ana i pre ye yene mundu ende ikine kamun muglo ongwa.

*Yesus nigl bolamugl konbauna ungwa  
(Matyu 14:22-33; Mak 6:45-52)*

<sup>16</sup> Ande beinagledi orko, Yesus disaipelma wagle ende ime niglmong eingwa. <sup>17</sup> Igle ye bot ta mina ende egli pindre ana niglmong sipraksi ende Kaperneam kamun enapre ende eingwa. Ana kamun mim pai kondungo, ye eimara igle Yesus akiye ta pikrikwa. <sup>18</sup> Ana kamun ir pond mangungo ana nigl sitombuno yakemake tongwa. <sup>19</sup> Ana disaipelma wagle bot awaresi pi 5 mo 6 kilomita yegl ta pindre ye kanigwa, Yesus nigl bolamugl konbauna wu bot mina mangigl wora ungo kade, ana ye kundugl geglkwa. <sup>20</sup> Ba Yesus ditongwa, “Kundugl goglkriyo, i na wingwa.” <sup>21</sup> Ye gunyei ana Yesus isuna bot mina endongo ana bot onglandi kaima endpi dumo enamunedi pre eimara igle kra plau dungwa.

*Yomba eremogl Yesus pre dokingwa*

<sup>22</sup> Enge i pradungo tangina yomba nigl koglo ya meglkwa ye kanigwa bot suwarata pai moglkwa, ana bot i mina Yesus disaipelma bogl akiye ta pikrukwa. Ba yene disaipelma keunde ende eingwa. <sup>23</sup> Ana okuwo bot tau, Tiberias yei ende wu Yesus ye bret diwakai yei tongo yomba neimara igle kra magl wingwa. <sup>24</sup> Yomba kanigwa Yesus disaipelma bogl igle moglkrikwa, ana ye bot tau wingwa ikra mina ende suna pi, Yesus pre doko ende Kaperneam kamun eingwa.

*Yesus yene kor-meglkwa bret*

<sup>25</sup> Yomba ende nigl koglo imbo pi ana Yesus moglko kandre, ye krapogl teingwa, “Beke Notnga, ene enge aunake ende igle une?”

26 Yesus ka mongo di ikine endungwa, “Na ka kaima ene di teinga, ene na pre dokingwa, i ene kimagl kanigwa ikra pre ta manga, ba ene bret neingwa dano orkwa ikra pre erikwa. 27 Ene kaiya mokna kinde orkwa ipre kongunmo erekragl kwa ba ene kaiya mokna kor aimande moragl kwa ipre kongunmo eriyo. Te kaiya mokna kor-moragl kwa i yene kaneta, Yomba Wam ene tenambuka, taragl i pra erambedi pre ana Nem God yombuglomo te kondungwa.”

28 Ye krapogl Yesus teingwa, “No srambre ere God kongun eraglmedi prumere i ouno kuno erambe?”

29 Yesus di ikine endungwa, “God kongunmo yegl: God yomba ta diendungo ungwa i ene pirngi dinagl kwa.”

30 Ipre ye krapogl Yesus teingwa, “Ene sragl kimagl etn no i kandre ana ene pirngi dinamune? Mo ene sragl taragl eratne? 31 No yagl awano okuna makan waule igle mana neingwa i pepa mina muno yegl beglko pangwa: ‘Heven suna bret-mana i God te atne endungo neingwa.’ ”\*

32 Yesus ditongwa, “Na ka kaima ene diteinga, Moses taragl tongwa i heven bret ta manga, ba na Nina heven suna bret kaima i ene tongwa. 33 Ana God bret tongwa i ye heven suna ende atne undre, ana makan yomba koglkoglo kor-moragl kwa pre tongwa.”

34 Ye dingwa, “Yagl kande, bret i engenge no noro.”

---

\* **6:31:** Kisim Bek 16:4; Buk Song 78:24,25

<sup>35</sup> Ana Yesus dinongugl endungwa, “Na nana kor-megl kwa bret, yomba ta ende na mina unambuka ye kindan goglkrambuka, te yomba ta na wedi pirngi dinan, ana ye nigl goglkrambuka. <sup>36</sup> Ana na ene diteinga, ene na kan-kondingwa ba pirngi dikrikwa. <sup>37</sup> Yomba prapra Nina na narkwa i ye ende na mina unaglmowo, yomba ta na mina unambuka ana na ye kinde kondokraglka. <sup>38</sup> Sraglpre na heven suna ende atne winga i nana pirmere eraglka pre manga, ba na diendungo winga yagle prumere mere eraglka. <sup>39</sup> Na diendungwa yagle i yegl eretenedi prukwa, yomba prapra na nare kondungwa i suwarata na kinde kondokraglka ba enge kande mina ye prapra simangimbo andigl ukor enaglkwa. <sup>40</sup> Ana Nina yegl prukwa, yomba prapra Wam kandre pirngi ditembi ye kor aimande moraglkwa. Ana enge kande mina na yomba simange ikor endinaglka.”

<sup>41</sup> Enge igle Juda yomba deno kumbro Yesus teingwa, sraglpre Yesus ka yegl dungwa ipre, “Na bret heven suna imbo ende atne winga.” <sup>42</sup> Ipre ye dingwa, “Yagl i Yesus, ye Josep wam moglkrumo? Te ye nem ya mam nono pirkan ounge. Sragl orko ye erme ka yegl di, na heven ende atne wiye dume?”

<sup>43</sup> Ana Yesus di ikine ende tongwa, “Enene mina deno kumbro di imboriya ende megl kwa i kondiyo. <sup>44</sup> Yomba ta yene pirmere ende na mina ukraglkwa, ba Nina na diendungwa yagle ye yomba auro iyu na mina endinambuka. Ana na enge kande mina ye simangimbo andigl ukor enambuka. <sup>45</sup> Ana propet wagle ka dingo

pepa muno yegl beglko pangwa, ‘Yomba prapra God yene ka di beke tenambuka.’<sup>✧</sup> Te yomba ta Nina kamo pirtre pir imbi, ana ye ende na mina unaglkwa. <sup>46</sup> Yomba suwarata Nina kankrikwa ba suwarata God mina ungwa i keme kangwa, God mina mogltre ungwa i keunde ye Nem kangwa. <sup>47</sup> Na ka kaima ene diteinga, yomba ta pirngi dinambuka ye kor aimande meglkwa inambuka. <sup>48</sup> Kor meglkwa bret i na nana moglka. <sup>49</sup> Ene kowano ye makan waule suna bret-mana neingwa ba ye geglkwa. <sup>50</sup> Ba bret-mana heven imbo ende atne ungwa i yomba ta ninaglkwa, ana ye gogkraglkwa. <sup>51</sup> Na nana kor-meglkwa bret i heven imbo ende atne wingwa ba yomba ta bret i ninan, ye kor aimande morambuka. Ana bret na tenaglka i na nangina, yomba koglkoglo kor aimande moraglkwa ipre na tenaglka.”

<sup>52</sup> Juda yomba ye deno kumbro tengramodi yegl dingwa, “Yagl i srambre ere ye nangiye noran ana nono ninamne?”

<sup>53</sup> Yesus di yomba tongwa, “Na ka kaima di ene teinga, Yomba Wam nangiye ya ye bormaimo i ene ta nekrimbi ana kor-moraglkwa i ene mina paikrambuka. <sup>54</sup> Yomba ta na nangina nendre te bormaina neimbi ye kor aimande moraglkwa inaglkwa, te enge kande mina na ye simange ikor endinaglka. <sup>55</sup> Sraglpre na nangina i kaiya mokna kaima, te na bormaina i nigl kaima. <sup>56</sup> Yomba ta ye na nangina ya te bormaina ninan ana ye na mina suna moran, ana na ye mina suna moraglka. <sup>57</sup> Ana Nina kor-moglkwa ye na diendungwa, ana ye mina na ama kor-moglka, mam-

---

<sup>✧</sup> 6:45: Aisaia 54:13

buno kuno yeglmere, yomba ta na ninambuka ye kor-morambuka, sraglpre na yombrana mina inambuka. <sup>58</sup> Bret i heven imbo ende atne ungwa. Ene kowano awano ye bret-mana nendre ana okuwo ye geglkwa. Yeglmere ta manga, ba yomba ta bret i ninambuka ye kor aimande morambuka.” <sup>59</sup> Kaperneam kamun makai yungu yungugl kra Yesus ka bekete mogltre ana ka i ditongwa.

*Yesus kamo i mina kor aimande moraglkwa*

<sup>60</sup> Disaipelma wagle ya yomba merkinde Yesus kamo pirtre ana yegl dingwa, “Ka giglendi kaima beke norkwa, ka i ira pir-inambe?”

<sup>61</sup> Yomba ta Yesus ka i ditekrikwa, ba Yesus kango ka dungwa ipre tengramo dingwa. Yeglpre Yesus ka di yomba tongwa, “Ka dinga ipre ene yumbun de pirmo? <sup>62</sup> Ana Yomba Wam ende ikine pi okuna mogl umara enan ana ene kandre sragl wedi piraglme? <sup>63</sup> Ana yomba kor-meglkwa i God Spiritmo tongwa, ba nangino kongunmo ta paikrukwa, na ka ene erme dite moglka i spirit ya te kor-meglkwa ka. <sup>64</sup> Ba ene yomba tau pirngi dikrikwa.” I Yesus okuna mambuno bogl umara ime ye kangwa yomba tau ye pirngidi tekrimbi, te iramere ye i-pene ende kunda ikine onguno mina yenambuka i pirkan orkwa. <sup>65</sup> Yesus ka di aine yegl dungwa, “Ana mambuno ipre na ene diteinga, yomba yene ta na mina ukraglkwa, ba Nina ta akepledi tenambuka yomba i keunde na mina unaglkwa.”

<sup>66</sup> Enge igle Yesus ka dikondungo ana yomba mokomugl eingwa ikra ende ikine pindre ana Yesus omara aglketa pikrikwa.

<sup>67</sup> Yeglpre Yesus krapogl disaipel 12 wagle tongwa, “Ene ama na kondo endinamnedi pirmo?”

<sup>68</sup> Saimon Pita di ikine ende tongwa, “Yaglka-nde, no ira moglmara enamune? Ana kor aimande meglkwa ka i ene mina pangwa. <sup>69</sup> Ana no etne pirngi dumga, te pirkan ounga i ene Suwara Holi mogltre, God mina unga.”

<sup>70</sup> Yegl dingo ana Yesus di ikine endungwa, “Ene 12 prapra na ta pinde ikrisino? Ba ene mina suwarata spirit kinde meglkwa.” <sup>71</sup> Yesus eremogl Judas pre dungwa, ye Saimon Iskariot wam, ana disaipel 12 mina Judas okuwo Yesus i-pene ende kunda ikine tenambuka.

## 7

### *Yesus ya yene angiglma wagle*

<sup>1</sup> Enge tau mokomugl, Yesus eremogl Galili suna winambodi wanmogltre, ana Judia kamun suna enakiurkwa. Sraglpre, Juda yomba kande wagle Yesus sigoramnedi pre igle sugl meglkwa. <sup>2</sup> Ana Juda yomba kamambuno sel yungu mina makai sindre God ofa teingwa enge kande i magl orkwa. <sup>3</sup> Yeglpre Yesus angiglma wagle diteingwa, “Ene dumo igle kondo ende Judia po, ana ene disaipel-nen wagle kimagl etn kanaglkwa. <sup>4</sup> Yomba ta ye kangiye panambedi pirkwa i kongun ere teke pandiglkrambuka. Ene kongun yegl etnga pre, ana etne ene yomba prapra ongumutno mina ere pene endimin ye kanaglkwa.” <sup>5</sup> Ana yene angiglma wagle Yesus pirngi dikrikwa.



<sup>6</sup> Ipre Yesus di ikine endungwa, “Na engena ta magl ukrukwa. Ba engenge i ene engeno yongwa. <sup>7</sup> Makandle yomba ene ta kankinde yei tekraglkwa, ba ye kankinde yei na naraglkwa. Sraglpre, ye mambunono kinde erme i na dipene endinaglkwa. <sup>8</sup> Ana ene pi God Akeple Dungwa enge kande plau dumara i piyo. Na igle ta pikraglka, sraglpre na engena ta magl ukrukwa.” <sup>9</sup> Yesus ka yegl di angiglma tendre ana ye Galili kamun mogl pangwa.

*God Akeple Dungwa enge kande mina igle Yesus ka beke tongwa*

<sup>10</sup> Ana ye angiglma wagle God Akeple Dungwa enge kande yomara endpi kondingo, okuwo Yesus ama endongwa. Ye pendigl pikrukwa, ba atne teke konbo ongwa. <sup>11</sup> Ana enge kande yomara suna igle Juda yagl kande wagle ye Yesus pre doko ana yegl dingwa, “Yagl i aglokra moglme?”

<sup>12</sup> Ana yomba merkinde Yesus pre ka ninu dingwa, “Ye yagl wakai moglkwa.”

Ba yomba tau yegl dingwa, “Ta manga, ye kakimbi di yomba tongwa.” <sup>13</sup> Ba yomba makai simara ye eremogl Yesus pre ka pere ta dikrikwa, sraglpre, Juda yagl kande wagle pre kundutno geglkwa.

<sup>14</sup> Ana God Akeple Dungwa enge kande makai singwa ikine pradungo ana ikine yoko pango, Yesus ende God holi yungumo mina pindre, ana mambuno bogl ka beke tongwa. <sup>15</sup> Ana Juda yagl kande wagle sipuglodi yegl dingwa, “Yagl i skul kande ta dikrukwa. Ba ye srambre ere beke pirkan orkwa i pond pame?”

16 Yesus di ikine endungwa, “Na ka beke teinga i nana mina ta ukrukwa, ba God mina unywa. Ye na diendungo winga. 17 Yomba ta God prumere taragl ta eragledi piran kade, ana na ka beke teinga i God mina unywa mo nana nomano mina diga i ye pirkan erambuka. 18 Yomba ta yene nomane mina prumere ka dungwa, ka dungwa i yene kangiyе kande inagledi prukwa. Ba yomba ta ye diendungwa yagle i kangiyе mina dipene endinan i ye ka kaima dungwa, ana ye mina kakimbi ta suna paikrukwa. 19 Moses lo ene tongwa. Ba ene suwarata lo i sika sikrikwa. Ene sraglpre na sigoramnedi erme?”

20 Ana yomba merkinde di ikine endingwa, “Spirit kinde ta ene mina suna moglkwa, ira ene sigoragledi orme?”

21 Yesus di ikine endungwa, “Na kimagl suwarata okuna erika i ene prapra nomano kanekane yeingwa.\* 22 Ba ene piryo, ene wano nangino punduno boraglkwa pre Moses yegl eriyo dungwa. I Moses keunde ta kamo manga. Ene kowano awano okuna ye mambuno bogl erikwa. Ana i pre ene yagl gak Sabat enge nangino punduno beglkwa. 23 Erme yagl gak ta Sabat enge nangino punduno beglmbi ana Moses lomo i ta erekinde erekrikwa. Sraglpre na okuna yagl ta kinde sungwa, ana Sabat enge kindemo mundu erewakai ere teinga ikra pre ene deno kumbro

---

\* **7:21:** Ka i Yesus yene Betsaida maugl nigl mina kimagl orkwa ikra pre dungwa mere pangwa. Jon 5:1-18 mina kandre te Kisim Bek 31:14-15 ama kano.

na narimo?† <sup>24</sup> Ene ta pirkan erekrimbi yomba ta yumbu sikriyo, ana ene mambuno kaima mina yumbu siyo.”

*Yesus ye Krais moglm kana*

<sup>25</sup> Jerusalem yomba tau yegl dingwa, “Yagl i sigoramnedi erikwa ikra moglum kana? <sup>26</sup> Kaima, yagl ikra magl moglkwa iwe. Ye yomba merkinde meglmara ka dungwa, ba yomba suwarata ka di ikine endekrikwa. I pre yomba kande wagle pirkwa ye kaima Krais moglme kana? <sup>27</sup> Ana Krais unambuka enge yomba suwarata ye aglokra mogl ungwa i ta pirkan erekraglkwa. Ba yagl i dumo aglokra mogl unga i nono pirkan ouna.”

<sup>28</sup> Ana Yesus eremogl God holi yungumo mina togl sunakra ka bekete ka kande yegl dungwa, “Ene na pirkan ere te dumo aglokra winga i ene pirkan erimo? Na nana pirmere ta ukrika, ba Nina na diendungo winga yagle i kaima moglkwa. Ana ye moglkwa i ene ta pirkan erekrikwa. <sup>29</sup> Ba na ye pirkan erika, sraglpre na ye mina winga, te ye na diendungwa.”

<sup>30</sup> Dungwa ipre yomba ye sikane sinamnedi erikwa, ba Yesus engemo magl ukrukwa. Yeglpre, yomba ta Yesus nangiye akekrikwa. <sup>31</sup> Ana yomba prapra meglkwa i merkinde ye Yesus pre pirngi

---

† **7:23:** God lomo mina yegl dungwa: Yagl gak kuglambu ta mam kugl yenan ana ande enge 8 moran ana nangiye punduwo bogl endinaglkwa. Wok Pris 12:3 mina kano. Yesus makan mina wanmoglkwa enge i kongun kanekane ta Sabat enge erekraglme dingwa ba nangino punduwo boraglkwa i Sabat enge ta yongo ana ye Sabat lo i sende ana nangino beglkwa.

dindre ana dingwa, “Ba Kraisi unambuka enge ye kimagl mere ertre ana yagl i engrambo?”

*Yesu sikane sinaglmedi kimbirnem tau diendingwa*

<sup>32</sup> Yomba prapra Yesu taragl orkwa ikra pre ka ninu kanekane dingwa i Parisi wagle pirtre, ana ye yeingo pris kande wagle bogl ye kimbirnem diende, pi Yesu sikane siyo dingwa.

<sup>33</sup> Ana Yesu ditongwa, “Na ene bogl enge sun-gunagle ta moramga, ana okuwo na diendungo winga ye moglmara ende ikine enaglkwa. <sup>34</sup> Ene na pre doknaglkwa, ba ene na ta doko kan ikraglkwa, te na moraglmara dumo i ene ta ukraglkwa.”

<sup>35</sup> Ana Juda wagle ye yene di imboriya endingwa, “Yagl i ende aglokra enan, ana nono ye ta kankramune? Mo ye endpi nono yombano okuna singo endpi Grik kamun meglmara suna igle kra pindre, ana kamambuno Grik yomba beke tenapre dum kana? <sup>36</sup> Sragl mambuno pango ye ka yegl dum, ‘Na pre ene doknaglkwa, ba na ta doko kan ikraglkwa, ana aglokra moraglmara igle ene ta ukraglkwa?’ ”

*Niglkor aimande kuglosi pangwa i pre Yesu dungwa*

<sup>37</sup> Ana kamambuno pirkwa enge kande kaima ikra mina mogl wingwa dundinambuka enge Yesu andigl mogl ka pond dindre ana yomba prapra ditongwa, “Yomba ta nigl goran kade kanwinge erimbi ye ende na moglmara undre ana ninambuka. <sup>38</sup> Kamambuno mina okuna muno yegl beglko pangwa: ‘Yomba ta na pirngi dinan, ana kor aimande meglkwa nigl i yene munduwo

ombo mina suna kuglosi ende bina unambuka.’ †  
 39 Ye ka i Holi Spirit pre yegl dungwa. Yomba ta ye wedi pirngi dinaglkwa, ana Holi Spirit inaglkwa. Ana enge igle Yesus kangiyе kande ikrukwa ipre Holi Spirit ende atne ukrukwa.

*Yomba yumbusi wu perepere eingwa*

40 Yomba tau ka dungwa i pirtre, ana dingwa, “Yagl i kaima propet ta moglkwa.”

41 Te tau ye Kraiѕ moglme dingwa.

Ba tau ama krapeglkwa, “Galili kamun igle Kraiѕ sraglmere unambe?” 42 Sraglpre, kamambuno pepa mina okuna muno yegl di beglkwa pangwa, “King Devit yungumo ombuno mina suna i Kraiѕ plau dinambuka, ye Betlehem kamun kugl yembi, ana Devit okuna taun moglmara igle.” 43 Ana yomba eremogl Yesus pre nomano perepere yongo, ana yumbusi epigl suwo erikwa. 44 Ana yomba tau sikane sinamnedi pirkwa, ba yomba suwarata onguno waiyadi nangiye ta akekrikwa.

*Juda yomba kande wagle pirngi dikrikwa*

45 Ana okuwo kimbirnem ende ikine pi pris kande wagle ya te Parisi wagle meglmara eingo, ana ye krapeglkwa, “Ene sragl orko ye auro isuna ya ukriѕe?”

46 Ana kimbirnem di ikine endingwa, “Yagle i sraglmere orkwa i yomba ta di norokrikwa.”

47 Ana Parisi wagle ka yegl di ikine endingwa, “Ye ene ama bakagl tom kana? 48 Ana nono mina

---

† 7:38: Epigl i mina Yesus ka dungwa i ka yeglmere kamambuno pepa tau mina ta paikrukwa. Ba Aisaia 44:3 ya Sindaun 18:4 mina kano.

ende okuna eingwa yomba ya te Parisi wagle ta Yesus wedi pirngi dimo? <sup>49</sup> Tamanga, yomba ye Moses lomo pirpogl sikrikwa ikra keunde God wau boraglme dungwa i mina meglkwa.”

<sup>50</sup> Nikodimas, okuna ye endpi Yesus moglmara ongwa. Ye ama Parisi wagle epitno i ta moglkwa, ana ye eremogl Parisi wagle yegl ditongwa, <sup>51</sup> “Nono lono mina yomba yoko ta ka-tange teiyo dumo? Tamanga, nono komnaiye kana ye kamo pirkan ertre, te ye sragl taragl orkwa i ene wakai ere pir kanpogl sinaglkwa.”

<sup>52</sup> Ba ye di ikine endingwa, “Ene ombugl Galili kamun nem motn kana? God kamo pepa mina suna beglko pangwa i ene kere pirpogl sinaglkwa. Ana propet ta Galili kamun wu pene enambe dikrikura.” <sup>53</sup> Yegl dingo ana yomba prapra suwarandi ende ikine yene yungunomugl eingwa. §

## 8

### *Ambu tayagl kunogl gundungo kanesi i-wingwa*

<sup>1</sup> Ana yomba prapra ende yungunomugl eingwa. Ba Yesus yene ende kamun muglo, Olip we dimara igle ongwa. <sup>2</sup> Kamun tangungo ana tangina kana, ye ende ikine God holi yungumo mina togl sunakra ongwa. Ana yomba prapra ende ye moglmara wu makai singo ana ye amedi mogl kamambuno wakai beke tongwa. <sup>3</sup> Ana lo beke teingwa yomba ya te Parisi wagle,

---

§ 7:53: Epigl 7:53 endpi 8:11. Erme pirpogl singwa yomba tau yegl pirkwa, ka i Jon yene boglkrukwa. Ba okuwo yomba ta muno boglmedi pirkwa.

ye eremogl ambu ta yagl kunogl gundungwa sikanesi iyu Yesus moglmara endingo andigl moglkwa. <sup>4</sup> Ana ye yegl di Yesus teingwa, “Beke Notnga, ambu i ye yagl kunogl gundungo yomba kanigwa. <sup>5</sup> Ana ambu yeglmere Moses lomo mina kombuglo si, sigoglo di norkwa. Ana ene sragl we dinatne?” <sup>6</sup> Ye yegl dingwa i ana Yesus ka ta di aglau eran pirtre ana ka di nangiye dangina mounedi pre dingwa.

Ba ye kan makandle ende ana ongo mongo pagl makan mina muno bogl moglkwa. <sup>7</sup> Ana ye prapra igle andigl mogl krapogl Yesus teingo, ana ye andigltre dindre yegl ditongwa, “Ana ene mina yomba suwarata tandaglme erekrambuka, ye kombuglo komnaiye ambu i nangiye mina suwondo.” <sup>8</sup> Yegl dindre, ye kordagl mangi dindre ana makan mina muno boglkwa.

<sup>9</sup> Yomba prapra ka i pirkwa enge, ana yomba dongagl wagle okuna kana ende eingo, ana yomba tau suwara suwarandi okuwo ende eingwa. Yesus yene moglko ana ambu ikra moglmara igle andigl mogl pangwa. <sup>10</sup> Yesus andigltre dindre ana ambumo ditongwa, “Ambu ya, yomba ikra aglo meglme? Yomba ene sinaglkwa ta moglkrim kana?”

<sup>11</sup> Ambumo yegl dungwa, “Yaglkande, yomba suwarata moglkrikwa.”

Yesus yegl ditongwa, “I wakai iwe, na ama ene ta si ka-tekraglka, ene ende pindre ana tandaglme aglketa erekro.”

*Yesus ye makandle ken ambuglange moglkwa*

<sup>12</sup> Yesus eremogl Parisi wagle kordagl ditongwa, “Na makandle ken ambuglange moglka, yomba ta na eimara mokonamugl unambuka, ye mim bongond ormara suna konbauna wankrambuka. Ba ye kor-megl kwa ken ambuglange i inambuka.”

<sup>13</sup> Ana Parisi wagle yegl di Yesus teingwa, “Ene enene pre ka yegl dinga ba yomba ka dinga i kaima dinedi ta pirkrikwa.”\*

<sup>14</sup> Yesus yegl di ikine endungwa, “Taman, na nana pre ka dinga i kaima dinga. Sraglpre na dumo aglokra wimara i pirtre ana ende dumo aglokra enaglmara i pirkan erika. Ba ene na dumo aglokra winga mo ende dumo aglokra enaglka i ene ta pirkan erekrikwa. <sup>15</sup> Ene yomba embriye mambuno erimere ipre ene yumbu singwa, ba na yomba embriye mambunono i ta yeglmere yumbu sikrika. <sup>16</sup> Ba na ta yumbu sinaglka mere pama dagl, na kaima pamere yumbu singo, sraglpre, nana mundu ta manga, Nina na diendungo winga bogl akiye mouglka. <sup>17</sup> Ana ene lono mina muno yegl beglko pangwa. Yomba suwo ka boglokiur wu suwara enan, ana ye ka dimbrika i kaima pangwa. <sup>18</sup> Ana na nana pre ka dinga ba Nina na diendungwa yagle ombugl na pre dipene endungwa.”

<sup>19</sup> Parisi wagle yegl di Yesus teingwa, “Nen aglokra moglme?”

Yesus yegl di ikine ende tongwa, “Ene na ta pirkan erekrimbi, Nina ombugl ta pirkan erekragl kwa. Ba ene na pirkan erimbi ana Nina ama pirkan eragl kwa.” <sup>20</sup> Yesus ka prapra dungwa

---

\* **8:13:** Epigl i Lo 19:15 mina kano.



i God holi yungumo mina yungugl kra, ofa teimara dumo igle mogltre ana ka beke tongwa. Ba yomba ta ye sikane sikrikwa sraglpre ye engemo ta magl erekrukwa.

*Na dumo ta eimara i ene ta pikraglkwa*

<sup>21</sup> Yesus aglke yegl di yomba tongwa, “Na ende bangeta eimbo ene na pre doknaglkwa, ba enene tandaglmeno mina goraglkwa, ene na enaglmara igle ta pirraglkwa.”

<sup>22</sup> Ye ka yegl dungwa ipre Juda yomba kande wagle yegl dingwa, “Yagl i eremogl ye enaglmara i nono ta pikraglme dungwa. I yene wisi gora pre dum kana?”

<sup>23</sup> Yesus yegl di ikine endungwa, “Ene atne igle yomba meglkwa, ba na kamun mitna imbo atne winga. Ene manginagle igle yomba meglkwa, ba na manginagle yomba ta moglkrika. <sup>24</sup> Yeglpre na ene diteinga, ene tandaglmeno mina goraglkwa. Te na yomba ira moglka i ene kaima ta pirngi dikrimbi, ene tandaglmeno mina goraglkwa.”†

<sup>25</sup> Ye krapogl dingwa, “Ene irane?”

Ana Yesus yegl di ikine endungwa, “Na ka i prapra okuna kana ene di teingra. <sup>26</sup> Ene kange tenaglmara i, na ka merkinde dinaglka pangwa. Ba ye na diendungo winga, ye kaima yene moglkwa. Ye ka dungo pirka mere i yomba koglkoglo diteinga.”

---

† **8:24:** Ka i Kisim Bek 3:14 mina God ka di Moses tendre ana yene kangiye yegl daglkwa, “Na Nana yegl moglka.” Te Yesus kangiye kuno yegl dungwa ba yomba ye ka dungwa i pirpogl sikrikwa. Ka tau i ama kano Jon 8:28 ya 8:58 te 13:19.

<sup>27</sup> Ana Yesus eremogl Nem pre dungwa i yomba ta pirpogl sikrikwa. <sup>28</sup> Yeglpre Yesus yegl ditongwa, “Ana ene Yomba Wam akepledi mitna endinaglkwa enge, ene pirkan eraglkwa. Na kaima moglmedi kanaglkwa, Nina ka yegl do dumere mere dinga. <sup>29</sup> Na diendungo winga ye na bogl mougkwa, ye na kondungo mundu ta moglkrika, sraglpre na engenge ye prumere i keunde erika.” <sup>30</sup> Ana Yesus ka yegl dungwa i yomba merkinde pirtre ana ye pirngidi teingwa.

*Yomba yoko meglkwa ya te kane paingwa*

<sup>31</sup> Yesus eremogl Juda yomba ye wedi pirngi dingwa wagle ditongwa, “Ene na ka beke teimere erimbi ana ene na disaipelna kaima moraglkwa.”

<sup>32</sup> Ana ene ka kaima mambuno pirpogl simbi ana ka kaima i ene kane poko endinan yoko moraglkwa.

<sup>33</sup> Yomba ikra di ikine ende Yesus teingwa, “No Abraham gawama mouna pre no yomba ta nigl kongunmo yoko ere tekunga. Ene sragl mambuno pango pre no kane poko endinagle dine?”

<sup>34</sup> Yesus di ikine endungwa, “Na ka kaima ene di teinga, yomba ta tandaglme erikwa i ana ye tandaglme kanemo paingwa. <sup>35</sup> Ana nigl kongun yoko orkwa yomba ye yagl kande yungumugl ta engenge moglkrambuka, ba yene wam yungugl aimande morambuka. <sup>36</sup> Ana Yomba Wam ene kane poko endinan, ene yoko kaima moraglkwa. <sup>37</sup> Na pirkan erika ene Abraham gawama meglkwa, ba na ka beke teinga i, ene nomano mina suna yeikrukwa pre ene na sigoramnedi erikwa. <sup>38</sup> Na Nina ombuno dumere

mere dimoglkwa, ba ene neno eriyo dumere mere erikwa.”‡

<sup>39</sup> Yomba ikra yegl di Yesus teingwa, “No neno Abraham moglkwa.”

Ana Yesus yegl di ikine endungwa, “Ene Abraham nangiglma meglmbi kade, ana ye mambuno ormere yegl eraglkwa. <sup>40</sup> Na Godna ka kaima dungo pirmere mere ene diteinga, ba ene na sigoramnedi erikwa. Abraham taragl yegl mere okuna ta erekrukwa. <sup>41</sup> Ene taragl erikwa i enene neno ta ormere mere erikwa.”

Ba ye di ikine endingwa, “No mano yagl guagua ta pindre no kugl yeikrukwa. Tamanga. God suwara no Neno moglkwa. No ye nangiglma kaima mouna.”

<sup>42</sup> Yesus yegl di ye tongwa, “Ene Neno kaima God moran kade ana ene na wakai kanaglkwa. Sraglpre, na God mina undre ana erme igle moglka. Na pirmere ta wu erekrika, ba ye na diendungo wingwa. <sup>43</sup> Ana sragl mambuno pango na ka dinga i ene pirpogl sikrime? Yeglpre na ka dinga i ene pir inaglkwa mere manga. <sup>44</sup> Ene yagl kinde nangiglma, neno Satan, ene neno prumere i ereere erikwa. Okuna imbo ye yomba sigoglkwa yagle, ye ka kaima ta ake moglkruko, te ka kaima nomano mina suna yeikrukwa. Ye kakimbi dungwa i ye mambunomo kaima pangwa. Ye kakimbi dungwa yagle, ana kakimbi dingwa yomba prapra ye neno. <sup>45</sup> Yeglpre na ka kaima ene diteinga, ba ene ta pirngi dikrikwa. <sup>46</sup> Ene

---

‡ **8:38:** Erme pirpogl singwa yomba tau ka i yegl yake tengwa, “Ene taragl prapra eraglkwa neno ka ditomere yegl eriyo.”

pirmbi na tandaglme ta erika pamo? Na ka kaima dinga panan ana sraglpre ene na pirngi dikrime?  
 47 Yomba ta God mina ungwa i ye God sragl ka dungwa i prukwa. Ba ene God nangiglma ta moglkrikwa pre ene ye kamo ta pirkraglka.”

### *Yesus ya Abraham*

48 Juda yomba di ikine ende Yesus teingwa, “Ene Samaria yomba motnga, ana ene mina spirit kinde suna moglme dunga ikra no aglau ere dumun kana?”

49 Ana Yesus yegl di ikine endungwa, “Na mina spirit kinde ta suna moglkrukwa, na Nina kangiye di mitna endinga ba ene na kangina ake atne endingwa. 50 Na nana kangina akeple dinagledi ta dikrika ba yomba ta na akeple dindre ana ye yumbu sinambuka. 51 Na ka kaima di ene teinga, yomba ta na ka dimere pinande eran ye ta goglkrambuka.”

52 Ye di Yesus teingwa, “Ana erme no kaima pirkan ounge, spirit kinde ta ene mina moglkwa. Abraham goglko, te propet wagle geglka, ba ene yegl dinga. Yomba ta na ka dimere pinande eram-buka ye ta goglkrambuka. 53 Ana ene mogl-mitna ende no neno Abraham engitno? Ye goglko te propet wagle geglka ana ene ira moledi pitne?”

54 Yesus yegl di ikine endungwa, “Ana na, nana kangina ta akeple dinagledi erimbo na kangina ta paikrambuka. Yomba ta na kangina akeple dungwa i na Nina. Ye suwara i ene Godno we dingwa. 55 Ene ye kaima ta kankrikwa, ba na ye kaninga. Ana na ye ta kankriye dimbo, ene kakimbi yomba meglmere yegl eraglka. Ba na

ye pirkan erika pre ye kamo dumere pinande erika. <sup>56</sup>Ene neno Abraham ye gun pond yongwa, sraglpre ye na engena i yenan kanagledi pre gun yongwa. Ye enge i kandre ana munduwo argan orkwa.”

<sup>57</sup>Juda wagle di Yesus teingwa, “Ene buglayungu 50 ta nekitnga, ana Abraham sraglmere kan-ne?”

<sup>58</sup>Yesus yegl di ikine endungwa, “Na ka kaima di ene teinga, Abraham mam kugl yeikruko, na okuna mogl painga.” § <sup>59</sup>Ana dungwa ipre yomba kumbruko ye kombuglo ake mina ende ana Yesus sinannedi erikwa, ba Yesus teke pai ana God holi yungumo togl suna igle kondo ende menda ongwa.

## 9

*Yagl ta mam kuglmara ongumuglo mim orkwa ana Yesus erewakai orkwa*

<sup>1</sup>Yesus konbauna wan ende pindre ana kango yagl ta mam kuglmara ongumuglo mim orkwa igle moglkwa. <sup>2</sup>Ana disaipel wagle krapogl Yesus teingwa, “Beke Notnga, ira tandaglme orkwa pre yagl i kugl yemara ongumuglo mim orme? Yagl i yene mo te nem mam tandaglmeno pre ye kuglmara ongumuglo mim orme?”

<sup>3</sup>Yesus di ikine endungwa, “Ye yene ya te nem mam tandaglmeno pre tamanga. Ye ongumuglo orkwa i God yombuglomo yagl i mina kongun ere i-pene endinan kanaglkwa pre orkwa. <sup>4</sup>Erme ambuglangesi pamere, na diendungo winga ye

---

§ 8:58: Ka i Jon 8:24 mina pangwa i kano.

kongunmo nono eramga. Mim panambuka enge i yomba kongun ta erekraglkwa. <sup>5</sup> Na makandle mogl painga enge, na makan mina ambuglange moglka.”

<sup>6</sup> Ye ka i di kondo ana eursi makan mina ende akewikai orko wu gamba buglkwa ongo ana indre yagl ikra ongumuglo mina koglkoglo akindre, <sup>7</sup> ana ditongwa, “Ene ende Siloam Niglmong pindre guman dran nigl koglo.” Siloam mambunomo yegl, ‘Diendungwa.’ Yegl dungo ana yagl ikra pi nigl pango ana ye ongumuglo pinedungo kanpogl sindre ana ende ikine yungumugl ongwa.

<sup>8</sup> Ana yomba yagl i keipamara magl meglkwa ya te yomba tau okuna yagl i kanigwa yomba ikra yegl pirkwa, sraglmere orumda di krapeglkwa, “Yagl i okuna amedi mogl moni yana di-di orkwa ikra kaima moglmo, mo?” <sup>9</sup> Yomba tau yagl i kaima moglme dingwa, te yomba tau dingwa, “Ta manga, yagl ikra mere kuno yene ta moglkwa.” Ba yaglmo yene dungwa, “Na yagl ikra moglka iwe.”

<sup>10</sup> Ana yomba krapogl teingwa, “Ene ongumutn srambre ere pinedungo kan-ne?”

<sup>11</sup> Ye di ikine endungwa, “Yagl ta kangiye Yesus we dingwa, ye gamba tau ere i buglkwa endindre ana ongumutna koglkoglo ake nare ana pi Siloam Niglmong paiyo dungo, ana na ende pi nigl paingo, ana ongumutna pinedungo kanpogl singa.”

<sup>12</sup> Yomba krapogl teingwa, “Yombamo i aglo moglme?” Yaglmo di ikine endungwa, “Na ye ta kankrika.”

*Parisi wagle yagl ongumuglo wakai orkwa ipre krapogl pirkwa*

<sup>13</sup> Ana okuna ongumuglo mim orkwa yagle ikra yomba auro ipi Parisi wagle meglmara eingwa.

<sup>14</sup> Yagl ongumuglo mim orko ana Yesus gamba buglkwa indre erewakai orkwa i Sabat enge ta taragl yegl orkwa. <sup>15</sup> Ye srambre ere ongumuglo kanmedi Parisi wagle aglke krapogl dipirkwa, “Ene srambre ere ongumutn pinedume?” Ana ye di ikine endungwa, “Ye gamba buglkwa tau indre ongumutna mina koglkoglo ake narko ana na gumana drana nigl koglko ana erme keunde ongumutna pinedungo kaninga.”

<sup>16</sup> Taragl yegl orkwa ipre Parisi wagle tau yegl dingwa, “Yagl i God mina ta ukrukwa. Sraglpre ye Sabat enge lo pamere ta erekrukwa.” Ba yomba tau dingwa, “Tandaglme yomba srambre ere yene kimagl giglendi yegl erambe?” Yegl dindre yene yumbusi wu ombuno suwo eingwa. <sup>17</sup> Ana Parisi wagle aglke kordagl krapogl yagle ikra teingwa, “Ene ongumutn mim orkwa ikra ye erewakai ere narume dinga. Ana ye pre ene sragl we dine?” Ye di ikine endungwa, “Ye propet ta moglkwa.”

<sup>18</sup> I kaima, yagl i okuna ongumuglo mim orkwa, ba erme ye ongumuglo pinedungo kangwa. Ipre Juda yomba kande wagle ye pre pirngi dina kiurikwa. Yegl ere ana yaglmo nem ya mam aglendi yundre, <sup>19</sup> ana krapogl teingwa, “Ene wano ikra kaima moglum kana? Ene ye kugl yembrika enge ye ongumuglo mim orme dimbrika. Ba sraglmere ere ye erme ongumuglo pinedungo kanume?”

<sup>20</sup> Ana ye nem mam suwo di ikine endimbrika, “Ye kaima no wano moglkwa. No kugl yombuglka

enge ye ongumuglo kaima mim orko no kambuglka. <sup>21</sup> Ba srambre ere ye ongumuglo pine-dungo kangwa, te yomba ira erewakai ere tongwa i no ta pirpogl sikuglka. Ipre ene ye krapogl tembi ana ye yagl moglkwa pre taragl ormere i yene di ene tenambuka.” <sup>22</sup> Ye nem mam suwo ka yegl dimbrika i Juda yomba kande wagle pre kundutno gogltre dimbrika. Sraglpre, Juda yomba ka yegl ta ama di gidingwa, yomba ta Yesus pre Mesaia we dinambuka, ana ye makai yungu i mina simenda endinamne dingo pangwa. <sup>23</sup> Ka yegl dingo pangwa ipre ana nem mam suwo yegl dimbrika, “Ye yene yagl moglumiwa, ipre ene ye krapogl piryo.”

<sup>24</sup> Ye aglke kordagl yagle ongumuglo mim orkwa ikra aglendi ikine ende ana yegl di yaglmo teingwa, “Ene God ongumuglo mina ka kaima dinatniwa! No pirkan ounga, yagl ene ongumutn erewakai orkwa i ye tandaglme yomba.”

<sup>25</sup> Ana yaglmo di ikine endungwa, “Ye tandaglme orkwa yomba mo erekrukwa i na ta pirpogl sikrika. Taragl suwarata na pirkan erika i na okuna ongumutna mim orkwa ba erme ongumutna pinedungo kaninga.”

<sup>26</sup> Ana ye krapogl teingwa, “Ye sragl ere ene to du? Ye sraglmerere ere ene ongumutn mim orkwa i erewakai orme?”

<sup>27</sup> Yaglmo di ikine endungwa, “Na ene dite kondingra, ba ene pirpogl sikrikwa. Sraglpre ene aglke kordagl ka i piramnedi pre dime? Mo, ene ombugl yaglmo i disaipelmo moramnedi pirm kana?”

<sup>28</sup> Ye eremogl yagl i ka-tendre ana dingwa, “Ene yagle i disaipelmo motnga, ba no Moses



disaipelmo mounga. <sup>29</sup> No pirkan ounge God ka di Moses tongwa. Ba yagl i aglokra unywa i no ta pirkanpogl sikunga.”

<sup>30</sup> Ana yaglmo di ikine endungwa, “Ene ka kaneta kaima dingwa! Ye aglokra unywa i ene pirkan pogl sikrikwa, ba na ongumutna mim orkwa ikra ye erewakai ere narkwa. <sup>31</sup> Nono punya tandaglme erikwa yomba kanno i God ta pir tekrambuka, ba yomba God dumere pinande ertre te God prumere erikwa yomba i ana ye kanno God prukwa. <sup>32</sup> Te okuna imbo kamun makan plau dungwa enge yei ende wu erme unywa, yomba ta mam kugl yongwa ongumuglo mim orkwa erewakai erikwa i kamo boglo ta pirkunga. <sup>33</sup> Ba yagl i God mina ta ukran, ye taragl yegl ta erekrambuka.”

<sup>34</sup> Yegl dungo ye di ikine endingwa, “Ene tandaglme mina kugl yeingo ana tandaglme ene mina pango ana yake wu kande enga, ba ene erme no beke noragledi pre dino?” Yegl dindre ye makai yungu mina simenda endingwa.

*Yomba pirngi dikrikwa ye Spirit mina ongumutno mim orkwa*

<sup>35</sup> Yaglmo i simenda end-ime dingo Yesus pirtre ana yagle i doko kan indre, ditongwa, “Ene Yomba Wam i pirngi dino?”

<sup>36</sup> Yaglmo di ikine endungwa, “Yaglkande, yaglmo i irane? Dinatn kade ana na ye pirngi dinaglka.”

<sup>37</sup> Ana Yesus di ikine endungwa, “Kaima, ene ye kan kondinga, ana yaglmo i erme ene bogl ka di miurka iwe.”

<sup>38</sup> Yaglmo ikra dungwa, “Yaglkande, na pirngi diga.” Yegl dindre ana Yesus moglmara guma-mugl dembiye karaugl ere tongwa.

<sup>39</sup> Ana Yesus dungwa, “Na yomba yumbu sina pre ende makandle winga, yegl erimbo ana yomba ongumutno kin yongwa pinedinan kanimbi te ongumutno pinedungo kanigwa ye ongumutno kin yenambuka.”

<sup>40</sup> Ana Parisi wagle tau ye bogl meglkwa ka dungwa i pirtre ye krapogl teingwa, “No ama ongumutno kin yongo pre din kana?”

<sup>41</sup> Yesus di ikine endungwa, “Ene ongumutno kin yenan, tandaglme dange paikrambuka, ba erme ene ongumutno wakai pame dingwa, ipre ene tandaglmeno yoko pai moglkwa.

## 10

*Sipsip sugl yomba ya yene sipsipmo pre diboglkwa*

<sup>1</sup> “Na ka kaima ene di teinga, sipsip togl sunakra meglmbi, ana yomba ta ye togl dra yomara ende suna ukrambuka, ba ye togl bange oglosi ende suna unan, ana ye kunogl gogl yomba taragl wau sina pre ungwa. <sup>2</sup> Ana yomba ta togl dra yomara ende suna ungwa i ye sugl yomba kaima, yene sipsipmo meglmara pre ungwa. <sup>3</sup> Ana togl dra sugl moglkwa yomba togl dra ye pre yauro ende tenan ana sipsip ye ka dungwa nungo embriye pirkwa. Ana ye sipsipmo kangino dagltre, auro yend menda ongwa. <sup>4</sup> Ye sipsip prapra auro yend menda ongwa enge, ana yene ende komuno kaima ongo, ye sipsipmo ombugl omara

eingwa. Sraglpre, ye ka dungo nungo embriye pirkwa. <sup>5</sup> Ba yomba kor ta enambara i moko mina ta pikraglkwa. Tamanga, ye tekemo enaglkwa. Sraglpre, yomba kor nungo embriye i ye ta pirpogl sikrikwa.” <sup>6</sup> Yesus ka i di simbogl dungwa, ba yomba ditongwa i sragl ka di tongwa ye ta pirpogl sikrikwa.

*Yesus sipsip sutno yomba wakai*

<sup>7</sup> Yeglpre Yesus ka kordagl dungwa, “Na ka kaima ene diteinga, na nana sipsip konbono dra moglka. <sup>8</sup> Ana yomba tau okuna kana wingwa i ye kunogl gogl yomba ya taragl wau sineingwa yomba, yeglpre sipsip ye kanno pirkrikwa. <sup>9</sup> Na, nana konbo dra moglka. Ana yomba ta na moglmara unan ye wakai morambuka. Ana ye ende yungugl pindre te ende menda undre, ana kaiya mokna doko i-ninambuka. <sup>10</sup> Ana kunogl gogl yomba ungwawa i kunogl nendre, te sigogltre, ana siderwagl baruwagl era pre ungwawa. Ba na winga i kor-meglkwa indre, ana i aimande i-kau sinaglkwa.

<sup>11</sup> “Na, nana sipsip sugl yomba wakai moglka. Ana sugl yomba wakai, ye yene kor-moglkwa i sipsipmo pre kinde kondo gorambuka. <sup>12</sup> Ana moni pre kongun orkwa yomba, ye sipsip sutno yomba wakai ta moglkrukwa, te ye yene sipsipmo ta moglkrikwa. Yeglpre ye kanan agl are unan ana sipsip kindekondo teke endinambuka. Yegl eran kade agl are eremogl sipsip tau si ninan ana tau teke perepere enaglkwa. <sup>13</sup> Ana moni pre kongun orkwa yomba teke endongwa. Sraglpre ye topo pre kongun ere sipsip kakimbi kogl sugl moglkwa.

14 “Na, nana sipsip sutno yomba wakai moglka, na sipsipna kaningo, ana ye na pirkan erikwa. 15 Kuno yegl keunde, Nina na pirkan orko, na Nina pirkan erika. Yeglpre na kor-moglka i sipsip pre kinde kondinga. 16 Na sipsipna tau ama kuglka meglkwa, ye togl suwara igle ta moglkrikwa. Ipre na ye ombugl auro yunaglka, yegl erimbo na nunguna embriye pirtre togl suwara meglmbi ana sugl yomba nana suwara moraglka. 17 Ana Nina, na wakai kangwa i yegl pangwa. Na kor-moglka i kindekondo ana kordagl i-ikine endinaglka. 18 Yomba ta na kor-moglka i ta ikorugl endekraglkwa, ba na nana pirmere ere kor-moglka i kinde kondinaglka. Na goraglka ya te kor-moraglka i na yombutna pra kuno orkwa. I Nina taragl yegl ero dinare kondungwa.

19 Ana Juda yomba ka i pirtre aglke kordagl yumbusi wu epigl suwo eingwa. 20 Ana yomba merkinde yegl dingwa, “Ye mina spirit kinde suna moglko, ye du kaima orkwa. Sraglpre ye ka dungo ene kinano yei pir meglme?”

21 Ba yomba tau yegl dingwa, “Ye yegl dungwa i spirit kinde moglkwa mere ta dikrukwa. Ana spirit kinde yomba ongumutno kin yongwa ta erewakai erambo?”

### *Juda yomba Yesus wedi pirngi dikrikwa*

22 Ana Jerusalem suna enge kande ta plau dungo yomba makai singwa. I okuna God holi yungumo kei kondo ana i God yungumo we dingwa engemo yongwa. Enge i bi orkwa enge. 23 Ana God holi yungumo mina Solomon yungumo tekrika yei yomara yungugl kra Yesus konbauna ongwa.

<sup>24</sup> Ana Juda yomba wu ye moglmara makaisi winambo dindre, yegl dingwa, “Ene etngo no no-mano wu suwo pi paimoglkwa. Ipre ene kaima Kraismotn kade ana no dinongugl ende noro.”

<sup>25</sup> Ana Yesus di ikine endungwa, “Na ene kade dite kondinga, ba ene na ta pirngi dikrikwa. Na eremogl Nina kangiyemina kimaglerika i na pre dinongugl endungwa. <sup>26</sup> Ene na sipsipna ta moglk-iurikwa, ipre ene na ta pirngi dikrikwa. <sup>27</sup> Na sipsipna ka dinga i nunguna embriyepirko, na ye pirkan eriko, ana ye na mokonamugl wingwa. <sup>28</sup> Ana na kor aimande moraglkwa pre teinga, ana ye ta gogkraglkwa te yomba ta na onguna mina i ta simenda endekraglkwa. <sup>29</sup> Na Nina eremogl yomba i prapra na narkwa. Ye moglmitna ende taragl prapra engrukwa te Nina ongo mina yomba meglkwa i yomba ta wausi imenda endekrambuka. <sup>30</sup> Nina ya na yomba suwara yene mougkwa.”

<sup>31</sup> Ana aglke kordagl Juda wagle kombuglo mauro indre ana Yesus kombuglo sinamnedi erikwa. <sup>32</sup> Ba Yesus di ikine ende tongwa, “Na Nina kimaglwakai mere erodungo ana ere ene ombuno diteinga. Ana yegl erimara igle taragl ta aglaurorko pre ene kombuglo na sina erimo?”

<sup>33</sup> Ana Juda yomba di ikine endingwa, “No ene taragl wakai kanekane etnga ipre ene kombuglo sinamnedi ta ere dikungra, ba ene God dikiendeyenga ipre ounga. Ene yomba yokomotnga, ba enene God mole dinga.”

<sup>34</sup> Yesus di ikine ende tongwa, “Enene lono mina God ka yegl muno beglko pangwa ikra na di

teinga, ‘Ene god wagle meglkwa.’<sup>☆</sup> <sup>35</sup> No pirkan ouna, God kamo okuna muno beglko pangwa i ta dundikrambuka, kaima pangwa. Ipre God eremogl yomba pre god meglme dinan ana yomba i mina God kamo tenan di menda endinaglkwa. <sup>36</sup> Ba na Nina pinde indre na di makandle endungwa. Ipre na God Wam kaima mole diga, ba ene sraglpre na God dikinde yome dime? <sup>37</sup> Na Nina kongunmo i ta erekrimbo, ana ene na pirngidi narekriyo. <sup>38</sup> Ba na ye kongunmo erimbo, ene na pirngidi narekrimbi ana na kimagl erika ene i pirngi diiyo. Yegl ere ana na Nina mina moglko te Nina na mina moglkwa i ene pirkan eraglkwa.” <sup>39</sup> Ye aglke kordagl Yesus sikane sinamnedi erikwa. Ba Yesus meglmara igle ye kindekondo endongwa.

<sup>40</sup> Enge igle Yesus ende ikine koglo imbo Jordan kamun Jon Baptais okuna yomba baptais tomara ikra pindre ana igle enge tau moglkwa. <sup>41</sup> Ana yomba merkinde ende ye moglmara undre ana dingwa, “Kaima, Jon okuna kimagl ta erekrukwa, ba Jon yagl i pre kamo dungwa ikra kaima yene pangwa.” <sup>42</sup> Ana dumo igle yomba merkinde Yesus pirngi dingwa.

## 11

### *Lasarus goglkwa*

<sup>1</sup> Yagl ta kangiye Lasarus we dingwa ye kinde sungwa. Yaglmo i Betani kamun nem, dumo igle Maria ambauglo Marta bogl yungunomugl yongwa. <sup>2</sup> Ambumo Maria i angigle Lasarus kinde

---

<sup>☆</sup> **10:34:** Buk Song 82:6

sungo pangwa, ambumo suwara i kungo demine orkwa toindi Yaglkande kagle mina endindre, ana bre yungo pagl ye kagle mina koko endungwa. <sup>3</sup> Ana Maria ya Marta ka-singiye yegl di Yesus moglmara endimbrika, “Yaglkande, ene wakai kanga yagle ikra kinde sungwa.”

<sup>4</sup> Yesus ka i pirtre ana dungwa, “Kinde sungwa i Lasarus ta goglkrambuka. Taman. I God kangiye kande inambuka pre orkwa, te sragl yegl mina God Wam kangiye kande inambuka.” <sup>5</sup> Yesus eremogl Marta ambauglo Maria bogl ya Lasarus akiye wakai kangwa. <sup>6</sup> Ba ye eremogl Lasarus kinde sume dingo prukwa enge, ye moglmara angai igle ande enge suwo ombugl mogl pangwa.

<sup>7</sup> Ana okuwo ye disaipelma wagle ditongwa, “Nono ende ikine Judia kamun enamga.”

<sup>8</sup> Ba disaipelma wagle di ikine endingwa, “Beke Notnga, Juda yomba ene kombuglo sinamnedi erikwa ikra enge olto ta ende pikrukwa, ba ene erimara ikra aglke kordagl ende ikine enatno?”

<sup>9</sup> Yesus di ikine endungwa, “Ande enge suwara mina ande kuiya 12 paikrumo? Yagl ta ermine konbauna ende enan ana yange sikrambuka, sraglpre ye makandle ambuglange i kangwa. <sup>10</sup> Ba ye enduwer konbauna ende enan ye yange sinambuka, sraglpre, ye ambuglangemo ta yeikrukwa.”

<sup>11</sup> Yesus ka i dindre ana okuwo disaipelmo wagle ditongwa, “Nono yomba yeinomga Lasarus ye ugl pangwa, ba na pindre ana uglo yokimbo ye andrambuka.”

<sup>12</sup> Ye disaipelma wagle di ikine endingwa, “Yaglkande, ye ugl panan, ana argan eran andrambuka.” <sup>13</sup> Lasarus goglkwa ipre Yesus

dungwa, ba disaipelma wagle ugl kaima pangwa pre dumedi pirkwa.

<sup>14</sup> Yeglpre Yesus dinongugl ende disaipelma wagle tongwa, “Lasarus goglkwa. <sup>15</sup> Ana ye pamarana moglkrika ipre kinde ta pirkrika, ba gun yeinga. Sraglpre ene pirngino singigle dinaglkwa pre na taragl ta eraglka. Ana nono ende ye pamaromuno.”

<sup>16</sup> Ana Tomas kangiye ta Didimas we dingwa ye di disaipel tau tongwa, “Nono ombugl ende pindre ana Lasarus bogl akiye goramga.”

*Yomba kor-meglkwa i Yesus yene tongwa, te geglkwa ere-ikor endungwa*

<sup>17</sup> Yesus disaipelma bogl endpi Betani kamun plau dindre, ye pirkan orkwa Lasarus goglko kombuglo dra yomba geglko pandiglmara yungugl endingo pangwa i ande enge 4 dundungwa.

<sup>18</sup> Ana Betani kamun yei ende Jerusalem ongwa i eglke ta manga, 3 kilomita keunde yongwa.

<sup>19</sup> Ana Juda yomba merkinde Marta ya Maria ye angro goglkwa ipre ana gaugl wu ounga yungu meglkwa. <sup>20</sup> Marta eremogl Yesus ume dingo pirtre, ye ende menda pi kan inagledi pre ongwa, ba Maria yungugl mogl pangwa.

<sup>21</sup> Ana Marta di Yesus tongwa, “Yaglkande, ene mangigl igle motna daglma, na angra Lasarus ta goglkruko. <sup>22</sup> Ba na pirkan erika, ene taragl ta erme ombugl inagledi pre God kra poratnga i ene tenambuka.”

<sup>23</sup> Yesus di Marta tongwa, “Ene angitn andigl ukor enambuka.”

<sup>24</sup> Ana Marta ka mongo di ikine endungwa, “Na pirkan erika, enge kande mina yomba geglkwa



andraglkwa enge ye andigl aglke ukor enam-buka.”

<sup>25</sup> Yesus di Marta tongwa, “Yomba kor-meglkwya ya ta geglkwa andraglkwa i mambuno nana moglka. Yomba ta na wedi pirngi dinambuka ye gorambuka ba kondo kor-morambuka. <sup>26</sup> Ana yomba ta kor-mogltre na wedi pirngi dinambuka ana ye goglkrambuka. Na ka dinga i ene pirngi dino?”

<sup>27</sup> Marta di ikine endungwa, “Owo, Yaglkande. Kaima na pirngi dinga. Ene Mesaia, God Wam. Ene ende makandle unatne dingura.”

### *Yesus Lasarus miriye gogl kai orkwa*

<sup>28</sup> Ana Marta ka yegl dikondo, ye ende ikine pindre ambauglo Maria aglendi bina endindre ana ninudi kina mina ende yegl ditongwa, “Beke narikwa yagle ungwa magl ya mogltre ana ene we dungwa.” <sup>29</sup> Maria ka i pirtre ana onglandi andigltre ende Yesus moglmara ongwa. <sup>30</sup> Ana Yesus ende yungu epigl suna pikrukwa, ba Marta ka ditomara dumo igle kra mogl pangwa. <sup>31</sup> Juda yomba ye Maria bogl akiye ounga yungu meglkwya ikra ye kanigwa Maria ende menda ongo, ana ye kombuglo dra yomba geglko pandiglmara igle kai era pre omedi ye mokomugl eingwa.

<sup>32</sup> Ana Maria ende pi Yesus moglmara kandre ana yange ye kagle mina sindre dungwa, “Yaglkande, ene eglya motna dagl na angra ta goglkruko!”

<sup>33</sup> Ana Yesus kangwa Maria kai orko, te Juda yomba akiye wingwa i ye ama kai erikwa. Yesus kinde pirtre ana kai eragledi orkwa. <sup>34</sup> Yesus krapogl tongwa, “Ene aglokra ye maugl sime?”

Ana ye diteingwa, “Yaglkande, kanatna wo.”

<sup>35</sup> Ana Yesus kai orkwa.

<sup>36</sup> Ana Juda yomba kandre dingwa, “Kaniyo! Ye Lasarus wakai kaima kangwa pamiwo!”

<sup>37</sup> Ba yomba tau dingwa, “Ye okuna kana yomba ongumutno mim orkwa erewakai orkura? Ana ye akeple dinan yagle i goglkrambuka ba?”

*Yesus eremogl Lasarus goglkwa aglendi ikor endungwa*

<sup>38</sup> Yesus nomanemo yumbun pond kaima dongo, ana ye endpi Lasarus gogloko pandiglmara dumo ongwa. I kombuglo dra ta waugl yeimara igle pandigl ana kombuglo ta dramugl sipegl dingwa. <sup>39</sup> Ana Yesus yegl dungwa, “Kombuglo i-eglke endiyo!”

Ana yagl goglkwa ambauglo Marta yegl dungwa, “Yaglkande, erme kumbuno kinde orkwa. Sraglpre, ye pandiglkwa ande enge 4 igle pangwa.”

<sup>40</sup> Ana Yesus ditongwa, “Ene pirngi dimin, God yombuglomo kanatnedi na ditekrisino?”

<sup>41</sup> Yegl dungo ana yomba kombuglo egl pagl i-eglke endingwa. Ana Yesus kanimbo heven ende yegl dungwa, “Nina, na ene diwakai yeinga, sraglpre ene kamange okuna erika pirpir etngra.

<sup>42</sup> Na pirka, ene engenge na kamangena pitnga ba na ka dinga i yomba magl meglkwa ya pre dinga. Sraglpre, ene diendingo ye umedi pirngi dinaglkwa.”

<sup>43</sup> Yesus ka i di kondo ana agle binan bogl dungwa, “Lasarus, ene ende menda wo!” <sup>44</sup> Yagl goglkwa ikra ende menda ungwa ba ye ongo ya

kagle mina gagl alap yombugl tendre, ana gumadra mina gagl alap ta were teingwa i yoko pai moglkwa. Ipre Yesus di yomba tongwa, “Gagl alap yombugl pandiglkwa i poko ende ana kan winge erimbi endenano.”

*Yomba kande wagle Yesus sigora pre ka dikeglkwa*

*(Matyu 26:1-5; Mak 14:1-2; Luk 22:1-2)*

<sup>45</sup> Juda yomba merkinde Maria kana pre wingwa ikra ye Yesus taragl orkwa i kandre ana Yesus pirngi diteingwa. <sup>46</sup> Ba yomba tau ende Parisi wagle meglmara pindre ana Yesus taragl orkwa ikra diteingwa. <sup>47</sup> Ana pris kande wagle ya Parisi wagle ye kaunsol bogl wu suwara pi ka-tange, ana dingwa,

“Nono sragl eramne? Yagl i kimagl mere orkwa. <sup>48</sup> Nono kanwinge ouno ye mambuno yegl ere paimoran, yomba prapra yagl i pirngidi tembi, ana Rom yomba kande wagle undre God holi yungumo erekinde ere ana nono dumono makano akiye inaglkwa.”

<sup>49</sup> Ana ye mina yagl suwarata moglkwa kangiye Kaiapas, ye buglayungu igle mina pris kande moglkwa, ye yegl dungwa, “Ene taragl prapra ta pirpogl sikrikwa! <sup>50</sup> Ene pirpogl sikrimo, yagl suwarata yomba prapra goraglkwa i mere, ye suwara gorambuka i wakai pangwa, nono yombano prapra ye gogl dinaglkwa.”

<sup>51</sup> Ana Kaiapas ka dungwa i yene prumere ta dikrukwa, buglayungu igle ye pris kande Jerusalem dumo suna i mogltre, ana ye ka propet dungwa i kaima yene ana Yesus eremogl Juda

yomba pre gorambuka. <sup>52</sup> Ana Juda yomba keunde tamanga, ye gogltre God yombamo makan koglkoglo perepere meglkwa kombusi isuna endinan, ana ye wu yungu ombuno suwara enaglkwa. <sup>53</sup> Enge igle Juda yomba mina ende okuna eingwa yomba Yesus sigoramnedi pre mambuno ere ka dikeglkwa.

<sup>54</sup> Yegl erikwa ipre Yesus eremogl Juda yomba meglmara pendigl ta wankrukwa. Ye dumo igle kondo ana ende pi dumo mangigl ta makan waule yomara ongwa, dumo i kangiye Iprem. Ana igle yene disaipelmo wagle bogl meglkwa.

<sup>55</sup> Ana Juda yomba Pasova engeno kande magl orko, dumo kande igle yomba prapra ende egli Jerusalem suna pindre ana yene tandaglmeno koko endimbi kade ana okuwo Pasova yenambuka pre eingwa. <sup>56</sup> Ana ye God holi yungumo suna makai sindre, Yesus pre doko ye yene mina di pirpir erikwa, “Ene sragl wedi pirme? Enge kande mina ye kaima ukrambu-kana?” <sup>57</sup> Ana pris kande wagle ya Parisi wagle ka giglendi di yomba teingwa. Yesus moglpai ormara yomba ta kanimbi ana wu dinongugl endimbi ye kane sinaglkwa.

## 12

*Maria eremogl Yesus kagle kungo ere tongwa  
(Matyu 26:6-13; Mak 14:3-9; Luk 7:37-39)*

<sup>1</sup> Pasova ninaglkwa ande enge 6 paimoglko, Yesus ende Betani kamun ongwa. Igle Lasarus

dumomo ana ye goglko Yesus aglendi ikor endungwa yagle ikra. <sup>2</sup> Ye eremogl Yesus gunyei tendre, ana pokndungo kaiya moknamo igle akekun eriko ana Marta suro tongwa. Yesus ya yomba bogl meglmara igle Lasarus suna moglko akiye kaiya mokna neingwa. <sup>3</sup> Ana Maria kungo demine orkwa mendugl mingi mundu kausi moglko, ana topo pond boglkwa yundre toindi Yesus kagle mina ende, ana bre yungo pagl koko ende tongwa. Ana deminemo wakai yungugl igle mundu kau sungwa.

<sup>4</sup> Ba Yesus disaipelma mina suwarata kangiye Juda Iskariot, yagl i okuwo Yesus tekoglo kunda ikine onguno mina endinambuka yagle yegl dungwa, <sup>5</sup> “Sraglpre kungo demine orkwa mingi i nono topo K300 bogl indre, ana yomba kiuglgiunde meglkwa i tekune?” <sup>6</sup> Ye dungwa i yomba kiuglgiunde tenapre kaima ta dikrukwa. Sraglpre, ye kumbu kunogl yagl, ye eremogl Yesus disaipelma wagle monino gagl kine i-wangwa, ana ye nongura nina pre dungwa.

<sup>7</sup> Ba Yesus yegl dungwa, “Ambu i kanwinge eriyo! Na goraglka enge maugl na sinaglkwa pre, kanwinge erimbi kungo demine orkwa i ake morano. <sup>8</sup> Ana yomba kiuglgiunde ene bogl engenge moraglkwa. Ba na ene bogl engenge ta moglkraglka.”

*Yomba kande wagle Lasarus sigoramnedi ka dikeglkwa*

<sup>9</sup> Juda yomba merkinde pirkan erikwa, Yesus Betani kamun moglkwa. Yeglpre ye meglmara igle eingwa, ye pi Yesus keunde kana pre ta

pikrikwa, taman, Lasarus akiye kana pre eingwa. Lasarus okuna goglko Yesus simange ikor endungwa. <sup>10</sup> Ikor endungwa ipre, pris kande wagle ye Lasarus ombugl sigoramnedi ka merkinde dikeglkwa. <sup>11</sup> Sraglpre Yesus eremogl Lasarus ikor endungwa ipre Juda yomba merkinde yombano kande wagle kindekondo ana Yesus wedi pirngi dingwa.

*Yesus king mereyegl ende Jerusalem suna ongwa*

*(Matyu 21:1-11; Mak 11:1-11; Luk 19:28-40)*

<sup>12</sup> Tangina yomba merkinde kaima Pasova mina wingwa ikra pirkwa, Yesus ende Jerusalem ungwa. <sup>13</sup> Ipre yomba endi palm yaundongo bukondi ake indre ana ye umara kanamnedi ende menda pindre ana ye mangre, oodi, dingwa, “God dembiye siyo!”

“God ere wakai ere yomba i tenambuka, ye Yaglkande kangiyeye mina ungwa!”\*

“God ere wakai ere Israel yomba kingno tongwa!”

<sup>14</sup> Ana Yesus dongi nangigle kowo ta indre ana amedi mogltre endongwa, i kamambuno pepa mina dungwa pamere,

<sup>15</sup> “Saion dumo kande, yomba ene kundugl goglkriyo! Kaniyo, ene kingno ye dongi nangigle kowo mina bolamugl mogl ungwa.”✧

---

\* **12:13:** Buk Song 118:25, 26 ✧ **12:15:** Sekaraia 9:9

<sup>16</sup> Komnaiye kana yene disaipelma wagle sragl i prapra pirpogl sikrikwa. Ba okuwo Yesus andigl ukor pi ende heven ongo, ana taragl prapra ye pre pepa muno beglko pangwa ikra ya te ye mina taragl prapra ta okuna ereteingwa ikra disaipelma wagle pirpogl singwa.

<sup>17</sup> Ana Lasarus goglko kombuglo dra mina pandiglmara igle yomba mere Yesus bogl akiye meglko, ye agle dungo andigl ukor ongwa ikra pre ye kamo i aimande yomba boglo kugl wai dingwa. <sup>18</sup> Yomba mere pi Yesus umara konbo bange tengigl yeingwa sraglpre, ye kimagl orkwa i ye pirkwa pre. <sup>19</sup> Ana Parisi wagle ye yene ka i dipirkwa, “Ene kaniyo, nono taragl ta eramga kuno erekrukwa, sraglpre, yomba dumo koglkoglo ikra prapra pi Yesus omara mokomugl pi kondingwa i we.”

### *Grik yomba tau Yesus kanamnedi pirkwa*

<sup>20</sup> Pasova engemo yongo ana yomba God dembiye karaugl ere tena pre ende Jerusalem eingo, ana Grik yomba tau eimara pukamugl eingwa.

<sup>21</sup> Ana Grik yomba ikra wu Pilip moglmara wingwa, ye Betsaida kamun Galili suna igle nem. Ana Grik yomba dingwa, “Yagl kande, no Yesus kanamnedi punga.” <sup>22</sup> Ana Pilip pi Andru ditongwa. Ana ye suwo-akiye pindre Yesus ditembrika.

<sup>23</sup> Yesus di ikine ende tongwa, “Yomba Wam kangiye kande inambuka engemo erme magl orkwa. <sup>24</sup> Na ka kaima ene diteinga, wit mongo suwarata yange makan mina si goglkran ana mongo suwara i keunde yei panambuka. Ba

mongo i makan mina goran ana ye mongo merkinde korambuka. <sup>25</sup> Yomba ta yene kor-moglkwa ipre munduwo panan ana okuwo kor-moglkwa i wau borambuka. Yomba ta makandle kor-moglkwa i moko tenan ana ye kor aimande morambuka i ye inambuka pre yongwa. <sup>26</sup> Yomba ta na konguna erambuka ye na enaglmara unambuka, yeglpri na moglmara igle na konguna yomba ye akiye morambuglka. Yomba ta na konguna erambuka ye kangiyeye kande Nina tenambuka.

*Yesus yene gorambuka pre ka dungwa*

<sup>27</sup> “Erme na nomana yumbun dungwa ana na sragl we dinagle? Nina, ene akepledi naro, yumbun i na mina ukrano? Taman, yumbun ipre na winga, yeglpri yumbun unambuka enge i pra na inaglka. <sup>28</sup> Nina, ene etn kangin kande wu pene enano.”

Ana okuwo heven imbo ka ta dungwa, “Na kangina ere i-kande ende kondiga, te kordagl ere i-kande endinaglka.” <sup>29</sup> Yomba merkinde igle andigl meglkwa ka i pirtre ana ye dingwa, “Kamun gurgagla dungwa.” Te yomba tau dingwa, “Angelo ka ta di ye tongwa.”

<sup>30</sup> Ba Yesus yegl di yomba tongwa, “Ka dungwa i na pre tamanga ba yomba ene pre dungwa.

<sup>31</sup> Erme God eremogl makandle yomba katange tendre yumbu sinambuka enge yongwa, te makandle sugl moglkwa yagl kande i katange tendre ana simenda endinambuka.

<sup>32</sup> Te makandle na ake i-mitna endinaglka enge, yomba prapra imakai simbo nana mina



unaglkwa.”† <sup>33</sup> Ye ka dungwa i yene srambre ere giugogl gorambuka ipre dungwa.

<sup>34</sup> Ana yomba merkinde di ikine endingwa, “No punga lo yegl dungwa pangwa i Mesaia ye kor aimande morambuka, ba sraglpre ene ka yegl dine, ‘Yomba Wam ye ake i-mitna imbo endi-naglkwa?’ Yomba Wam i ye irane?”

<sup>35</sup> Yesus di ikine endungwa, “Ken ambuglange i enge sungunagle keunde ene mina depai enam-buka. Etne ene kenno-lam depangwa ipre engege ambuglange igle mina wanmoglpai eriyo, te tamanan ana mim pond ere wu ene ake i-atne ende dinambiwo, te yomba ta ye mim mina suna wanmoglkwa i ye ende aglokra ongwa i yene ta kanpogl sikrikwa. <sup>36</sup> Ken ambuglange i ene mina yongwa pre i ene pirngi diyo, yegl erimbi ana ene ken ambuglange yombama moraglkwa.” Yesus ka yegl dikondo okuwo ye ende pindre, ana yomba ye kan dinaglmedi teke pangwa.

### *Juda yomba Yesus pirngi dikrikwa*

<sup>37</sup> Yesus kimagl merkinde orko kanigwa, ba yomba ye wedi pirngi dikrikwa. <sup>38</sup> Yegl erikwa i ana propet Aisaia ka dungwa ikra pai yungwa: “Yaglkande, no ka ditomga i ira pirngi dume? Te yomba ira mina Yaglkande yombuglomo ombuno ditome?”✧

---

† **12:32:** Yomba eremogl Yesus ake plendi endi-prak mina pandraglkwa. Ana mambuno i mina God akeple dinan ana ye kaniye kande indre ende heven pindre mitna imbo kaima morambuka.

✧ **12:38:** Aisaia 53:1

<sup>39</sup> Mambuno ipre ye ana pirngi dinaglkwa kuno erekrukwa, sraglpre, propet Aisaia ka ta ama yegl dungwa,

<sup>40</sup> “God eremogl ye ongumutno akemim ertre te ka pirkraglkwa pre nomano konbo yonguglko, ipre ye ongumutno kankraglkwa te ye nomano pirpogl sikraglkwa. God yegl dungwa, ana ye erewakai ere norambedi pre na mina ukraglkwa.”<sup>☆</sup>

<sup>41</sup> Aisaia ka dungwa i sraglpre, ye Yesu ambuglangemo kangwa pre ana Yesu kamo dungwa.

<sup>42</sup> Kaima, Juda yomba kande wagle tau Yesu pre pirngi dingwa. Ba ye pirngino i dinongugl endekrikwa, sraglpre, Parisi wagle eremogl ye makaino yungo mina simenda ende di poraglmedi pre kundugl geglkwa. <sup>43</sup> Te kangino yomba ake mitna endinaglkwa i pirkwa kande orkwa, ba God ye kangino ake mitna endinambedi pirkrikwa.

### *Yesu kamo i ka-tange yomba tenambuka*

<sup>44</sup> Yesu ka kande di yegl dungwa, “Yomba ta na wedi pre pirngi dinambuka ye na keunde pirngi dikrukwa, ba na diendungwa yagle i akiye pirngi dungwa. <sup>45</sup> Yomba ta na kanigwa i ombugl na diendungwa yagle i akiye kanigwa! <sup>46</sup> Na ken ambuglange yeglmere ende makandle winga.

---

<sup>☆</sup> **12:40:** Aisaia 6:10

Yeglpree yomba ta na pirngi dinambuka, ye mimormara suna ta moglkrambuka.

<sup>47</sup> “Ba yomba ta na kanna pirtre ana na kanna i sika sikran, ana na ka-tange ye tekraglka. Na makandle winga i yomba yumbu sina pre ukrika, ba yomba ere-ina pre winga. <sup>48</sup> Yomba ta na moko nartre ana na kanna i pir ikran, ana yomba ta ye ka-tange tenambuka i pere moglkwa. Na ka dinga kamo i enge kande mina ka-tange tenambuka. <sup>49</sup> Ka i kaima sraglpree, nana pirmere mere ka ta dikrika, ba Nina na diendungwa yagle ka do dumere mere dinga te ama dinongugl endinaglka. <sup>50</sup> Ana na pirka ye ka dumara i kor aimande moraglka i dipene endungwa. Te na ka prapra dinga i Nina yegl do di narumere dinga.”

## 13

### *Yesus disaipelma wagle katno nigl kogl tongwa*

<sup>1</sup> Pasova ne-ne erikwa engemo i mangigl orko. Yesus prukwa ye makandle kondo ana ende ikine Nem moglmara enambuka engemo i magl orkwa. Ye yene yombama makandle meglkwa i engenge wakai kangwa mambuno i ye mina aimande paimoran ana ye gorambuka.

<sup>2</sup> Yesus disaipelma wagle bogl pokndungo kaiya mokna ne meglko. Ana Satan okuna kana no-mano kinde tongo Judas mina yongwa, ye Saimon Iskariot wam, ye Yesus ipi kunda ikine onguno mina yenambuka. <sup>3</sup> Ana Yesus pirkan orkwa i Nem yombuglomo giglendi mundu ye tekondungwa. Ana ye prukwa yene God mina ungua ana aglke ende ikine God moglmara enambuka.

<sup>4</sup> Ana ye kaiya mokna ne meglmara andigltre gaglmo suna olto tembe endungwa i gugl yei, ana gagl taul ta indre kumagl mereyegl ere dane mina dongwa. <sup>5</sup> Yegl ere ye niglkor tau toindi dis mina ende, ana ye mambuno bogl disaipelma wagle katno nigl kogltre, ana gagl taul kumagl dongwa ikra mina koko endungwa.

<sup>6</sup> Ye ende Saimon Pita moglmara ungo ana Pita yegl dungwa, “Yaglkande na katna ene nigl kogl naratno?”

<sup>7</sup> Ana Yesus di ikine ende tongwa, “Na taragl erme erika i ene ta pirpogl sikitnga, ba okuwo ene pirpogl sinatnga.”

<sup>8</sup> Ana Pita mane dungwa, “Ene na katna nigl koglktratnga.”

Ana Yesus yegl ditongwa, “Ba na ene katn nigl kogl tekrimbo ene na disaipelna ta moglktratnga.”

<sup>9</sup> Saimon Pita di ikine endungwa, “Yaglkande, ene na katna keunde nigl kogl narekratnga, ba na onguna ya te bitna ama akiye nigl kogl naratnga.”

<sup>10</sup> Yesus di ikine endungwa, “Yomba ta ye nigl mundu pai kondungwa i deglmbi kaima ta moglkrukwa, ipre ye nigl aglketa paikrambuka, ba ye kagle keunde nigl korambuka. Ene prapra deglmbi ta yeikrikwa ba yomba suwarata deglmbi yongwa.” <sup>11</sup> Sraglpre, yomba ira mere Yesus ipi yaglkumba onguno mina yenambuka i Yesus yene pirkan orkwa. Yeglpre ye dungwa, “Ene prapra deglmbi ta yeikrikwa, ba yomba suwarata deglmbi yongwa.”

<sup>12</sup> Ana Yesus yene disaipelma wagle katno nigl kogl kondindre, ye gaglmo suna olto i ende pandigl, ana ende ikine kaiya mokna neimara

boglmo mina amedi mogltre, ana ye krapogl tongwa, “Na taragl erme ereteinga i ene mambuno ta pirpogl simo? <sup>13</sup> Ene eremogl na pre Beke Notnga ya Yaglkande we dingwa, ana ene yeglmere kuno kaima dingwa, sraglpre dimere yegl na moglka. <sup>14</sup> Ana na ene Yaglkandeno ya te Beke Teinga yagle moglka, na erme ene katno keunde nigl kogl teinga. Ene ombugl na erimere enene ya te yomba ta katno nigl kogl teiyo. <sup>15</sup> Ene yegl eraglmedi na ombuno dinga. Ana na ene ereteinga yeglmere ene ama kuno yegl eriyo. <sup>16</sup> Na ka kaima ene diteinga, kongun yomba yoko ye mogl-mitna ende suglmo yomba ta engre tekrukwa, te kakep yongwa yomba ye mogl-mitna ende ana ka diendungwa yagle ta engre tekrukwa. <sup>17</sup> Ana erme ene mambuno kaima i pirkan kondingwa, ba ene kongunmo i duwo ere erimbi ana God eran ene gun pond yenaglkwa.

<sup>18</sup> “Na ka dinga i ene prapra pre tamanga, yomba na pinde inga wagle ye na kaninga. Ba kamambuno pepa mina okuna muno beglko pangwa ikra mongomo panambuka: ‘Ana yagl ta no bret akiye nombuglka ye kagle i-mitna ende na engre siderwagl erambuka.’<sup>☆</sup>

<sup>19</sup> “Na ka erme diteinga i mongomo okuwo wu pene enambuka, ana taraglmo i wu pene enam-buka enge ene na pirngi dinaglkwa. Na yagl i moglkwa pamiwo dinaglkwa.\* <sup>20</sup> Na ka kaima ene diteinga, yomba ta na diendinga i yomba ta di-inambuka, ye, na di-ingwa, te na yomba di-ingwa i ye ama na diendungwa yagle i di-ingwa.”

---

<sup>☆</sup> **13:18:** Buk Song 41:9      \* **13:19:** Ka i Jon 8:24 mina pangwa i kano.

*Judas eremogl Yesus yaglkumba tenambuka  
(Matyu 26:20-25; Mak 14:17-21; Luk 22:21-23)*

<sup>21</sup> Yesus ka i di kondo, okuwo ye nomano yum-bun pond dongo ana nongugl dipene endungwa, “Na kaima ene diteinga, ene mina suwarata na i-pene ende kunda ikine tenambuka.”

<sup>22</sup> Disaipelma wagle toro kan imbarara ende, ana ira pre Yesus dungwa i ye pirpogl sikrikwa.

<sup>23</sup> Disaipel suwarata, Yesus wakai kangwa ikra Yesus moglmara magl wora amedi moglkwa.

<sup>24</sup> Saimon Pita bre gimande disaipelmo i tendre ana dungwa, “Ira pre dum manda, ene ye krapogl pro.”

<sup>25</sup> Ana disaipel i goindi Yesus moglmara magl kaima ende ana krapoglkwa, “Yaglkande, ira pre dine?”

<sup>26</sup> Yesus ka mongo dipoglkwa, “Na bret nigl dis mina simbai tenaglka yagle, i suwara.” Yegl dindre ana bret ta indre dis mina nigl simbai ana Judas tongwa, ye Saimon Iskariot wam. <sup>27</sup> Judas bret ake yungwa enge, Satan ende Judas mina suna ongwa.

Ana Yesus ditongwa, “Ene taragl ta eragledi pitnga i onglandi ero.” <sup>28</sup> Ana Yesus ka i sraglpre di Judas tongwa, i disaipelma wagle tau kaiya mokna ne meglkwa i suwarata pirpogl sikrikwa.

<sup>29</sup> Judas moni gagl sugl moglkwa pre disaipel tau yegl pirkwa, ye pindre Pasova enge kande pre taragl tau topo erambuka pre ditomo mo, kiuglgiunde yomba taragl tau tenambuka pre dit-omedi pirkwa. <sup>30</sup> Judas bret indre ana onglandi ende menda ongwa. Ana dumo mim ere kon-dungwa.

*Yesus lo kor disaipelma wagle ditongwa*

<sup>31</sup> Judas ende menda ongo ana Yesus yegl dungwa, “Etne Yomba Wam kangiyе kande yungwa. Ana Yomba Wam mina God ama kangiyе kande yungwa. <sup>32</sup> Ba God kangiyе kande Yomba Wam mina inan, God ye yene Yomba Wam kangiyе kande i-pene endindre. Ana God onglandi ye kangiyе kande ye tenambuka.

<sup>33</sup> “Nangrima wagle, enge sungunagle ta ene bogl moraglkwa. Ana okuwo ene na pre dok-naglkwa, te Juda yomba prapra diteimere ikra ene erme diteinga. Na enaglmara dumo i ene ta ukraglkwa.

<sup>34</sup> “Na erme lo kor ta ene teinga. Yomba prapra i ene kanwakai yeiyo. Na ene wakai kaninga yeglmere ene ama yomba prapra kanwakai yenaglkwa. <sup>35</sup> Ba ene yomba prapra wakai kanimbi, ana yomba prapra kanaglkwa, ene Yesus disaipelmo meglmedi piraglkwa.”

*Pita okuwo di uglmange erambere ipre Yesus dipene endungwa*

*(Matyu 26:31-35; Mak 14:27-31; Luk 22:31-34)*

<sup>36</sup> Ana Saimon Pita krapogl Yesus tongwa, “Yaglkande, ene ende aglokra enatne?”

Ana Yesus di ikine endungwa, “Na dumo aglokra enaglmara i ene erme ta uktratnga, ba okuwo, na enaglmara i ene unatnga.”

<sup>37</sup> Pita krapogl tongwa, “Yaglkande, sraglpre ene enatnara na erme sikasi ukragle? Na ene pre goragledi akekun erika.”

<sup>38</sup> Ana Yesus di ikine endungwa, “Na pre ene kaima goragledi pitno? Na kaima ene diteinga,

konduwagle kumugl wi sikran, ana enge suwota na ye kankrika we dinatnga.

## 14

*Yesus disaipelma wagle munduno argan ka ditongwa*

<sup>1</sup> “Ene kinde pirtre nomano yumbun dekrano, ene God wedi pirngi dindre, ana na akiye pirngi diyo. <sup>2</sup> Na Nina yungumo mina igle kula merkinde yongwa, ana yegl ta yeikruma, na ene ta ditekriko. Ba na ende igle pindre ana ene moglpai eraglkwa dumono i akekun eraglka. <sup>3</sup> Ana na pindre angaino dumo ake kuno ertre, na ende ikine undre ene auro i-yeimbo, ana na moraglmara igle nono akiye moramga. <sup>4</sup> Na dumo aglo enaglka konbau-namo i ene pirkan erikwa.”

*Yesus mina konbaunayei ende pi nem moglmara ongwa*

<sup>5</sup> Tomas di Yesus tongwa, “Yaglkande, ene ende aglokra enga i no pirpogl sikunga. Ana konbauna yei ende dumo igle ongwa i srambre ere no pirkan eramne?”

<sup>6</sup> Yesus ka mongo di ikine ende tongwa, “Na nana konbauna mogl, ana ka kaima mogl, ana kor-megl kwa i na, nana moglka. Ana Nina moglmara enagl kwa i konbauna ta ta yeikrukwa. Ba na mina suwara yongwa. <sup>7</sup> Ana ene kaima yene na pirkan erimbi, ana Nina ama pirkan eraglkwa. Ana erme mambuno bogl ende imbor omga i ene ye pirtre ana kandre erikwa.”



<sup>8</sup> Ana Pilip ditongwa, “Yaglkande, ene Nen ombunodi notn ana no munduno pangwa i kuno erambuka.”

<sup>9</sup> Ana Yesus ka mongo ditongwa, “Na ene bogl enge olto nono akiye mogl umgra, Pilip, i ene pirpogl sikitno? Ana yomba na kanigwa i Nina ombugl kanigwa. Ba ene sraglpre Nen ombunodi noro dine? <sup>10</sup> Ana na Nina mina moglko te Nina na mina moglkwa. I ene pirngi dikrimo? Ana na ka ene diteinga i nana pirmara ta ditekrika. Sraglpre, Nina na mina moglkwa i yene kongunmo orkwa. <sup>11</sup> Na Nina mina moglko te Nina na mina moglme dinga i ene pirngi diyo, ka dimara i ene pirngi dikrimbi, ana na kimagl erimara i ene pirngi dinagl kwa. <sup>12</sup> Na ka kaima diteinga, yomba ta na wedi pirngi dinan, ana na taragl prapra erika i ye ama erambuka. Ba i kaima, na kongun erimere yegl ye kongun pond kaima ere kawa tenambuka. Sraglpre, na ende Nina moglmara eingwa. <sup>13</sup> Ana ene na kangina mina taragl ta pre krapotn, i pra eraglka. Yegl erambara i Nem kangiye kande Wam mina inambuka. <sup>14</sup> Ana na kangina mina ene taragl ta pre krapogl dimbi ana i na pra eraglka.

*Yesus eremogl Holi Spirit ka dipandigl dungwa*

<sup>15</sup> “Ene na wakai kanimbi kade, ana na ka kindine dimere i ene duglo boragl kwa. <sup>16</sup> Ana na Nina krapogl teimbo, ye ene akeple dinan yomburo panambuka pre ta tenan ana ye ene bogl aimande yene morambuka. <sup>17</sup> I ka kaima dungwa Spirit, makandle yomba ta ikraglkwa. Sraglpre,

ye ta kankre te pirpogl sikrikwa. Ba ene ye pirpogl singwa. Ipre ye ene bogl moglkwa, te ene mina suna morambuka. <sup>18</sup> Na endinaglka enge ene kinde kondimbo mundu gak-mua mereyegl ta moglkraglka. Ba okuwo na ende ikine ene meglmara unaglka. <sup>19</sup> Enge sungunagle ta makan-dle yomba na aglketa kankraglkwa. Ba ene na kanaglkwa. Sraglpre, na kor-moglkwa ipre ene ama kor-moraglkwa. <sup>20</sup> Ana enge igle ene pirkan eraglkwa, na Nina mina suna moglko, te ene na mina suna meglko, ana na ene mina suna moglkwa. <sup>21</sup> Ana yomba ta na ka kindine dinga i pir indre ana duglo borambuka i ye na wakai kaima kangwa. Yomba ta na wakai kanan ana Nina ama yombamo i wakai kanambuka, ana na ama ye wakai kandre ana na nana ye mina wu pene eimbo ye na kanambuka.”

<sup>22</sup> Ana Judas Iskariot tamanga, ba Judas dimo ta dungwa, “Yaglkande, ene no keunde ombuno dimin, ene kanamniwa, ana makan yomba koglkoglo i sraglpre ene kankraglme?”

<sup>23</sup> Ana Yesus di ikine endungwa, “Yomba ta na wakai kanan ana ye na ka beke teimere i ere duglo borambuka. Ana na Nina ye wakai kanambuka, ana na Nina bogl yombamo i meglmara umbuglo, ana ye bogl akiye aimande moramga. <sup>24</sup> Yomba ta na wakai kankran, ye na ka beke teinga i ta duglo boglkrambuka. Ana na ka ene diteinga, pirkwa i nana kanna tamanga, ba ka i Nina na diendungo winga yagle kamo.

<sup>25</sup> “Na ene bogl akiye mogl painga enge ana ka i prapra ene diteinga. <sup>26</sup> Ba Holi Spirit ene akeple

dinambuka, Nina eremogl na kangina mina di-endinambuka. Ye ene taragl prapra beke tenambuka, te na ka okuna diteinga ikra ene prapra ditenambuka. <sup>27</sup> Na dena munduna bipokndi i ene mina yendre, te na kordagl bipokndi i ene teinga. Na makandle yomba teimere yegl ene tekrika. Yeglpre ene nomano yumbun dekran te kundugl goglkriyo.

<sup>28</sup> “Ene na ka dinga i pirkwa, ‘Na ende bangeta pindre ana na aglke ende ikine ene meglmara unaglka.’ Ba ene na wakai kanimbi, ana na ende Nina moglmara enaglka i ene gun yenaglkwa. Sraglpre, Nina mogl-mitna ende na narkwa. <sup>29</sup> Ana taragl i plau dikriko kade na ka erme i ene diteinga, ana taragl i plau dinambuka enge ene pirngi kaima dinaglkwa. <sup>30</sup> Na ene bogl ka denbi wakane ta dikraglka. Sraglpre, makandle sugl moglka king i erme ungua. Ba ye yombuglomo ta panan kade na engre atne endekrambuka. <sup>31</sup> Ba makandle yomba pirkan eraglkwa na Nina kanwakai yeinga. Ipre Nina taragl yegl ero dinarumere i keunde na erika. “Ende wiyo. Nono dumo igle kondo endinamuna.”

## 15

### *Yesus yene wain endiye, nono yongagle*

<sup>1</sup> “Na wain endiye kaima moglko, ana Nina ereyaglkwa yagle. <sup>2</sup> Na mina yongagle ta paimogltre mongo koglkrukwa i prapra Nina boro endungwa. Ana yongagle na mina pai mogl mongo keglkwa i prapra ye beke ake orkwa, ipre mongo merkinde koraglkwa. <sup>3</sup> Na ka di teimara

i ene erewakai ere kondungwa. <sup>4</sup> Ene na mina mogl paiyo, ana na ene mina mogl panaglka. Yongagle yene ta mongo koglkrambuka, ye wain endiye mina pai mogltre mongo korambuka. Ene na mina moglkrimbi mongo ta koglkraglkwa.

<sup>5</sup> “Na wain endiye moglka, ana ene prapra yongagle, yomba ta na mina mogl panan, ana na ye mina suna moglmbo, ye mongo merkinde korambuka, ana na kondimbi ene taragl ta erekraglkwa. <sup>6</sup> Ana yomba ta na mina mogl paikrukwa, ye wain yongagle gige goglko ana boro kinde kondingwa yeglmere. Yongagle yeglmere gande makaisi piyasi donga mina endingo dongwa. <sup>7</sup> Ene na mina meglmbi, ana na kannna ene mina yei panan, ana taragl kanekane ta munduno panan kra poraglkwa, i pra inaglkwa. <sup>8</sup> Ene mongo merkinde koraglmara i mina na Nina kangiyeye kande wu pene enambuka, mambuno yegl mina enene na disaipelna mounedi ombuno dingwa.

<sup>9</sup> “Nina na wakai kanumere yeglmere, na ama ene wakai kaninga. Na kanwakai yeinga i mina ene aimande moraglkwa. <sup>10</sup> Ana na ka kindine dinga i ene dimere pinande erimbi, na kanwakai yeimara suna igle ene moraglkwa. Ana kuno yegl Nina ka kindine dungwa i na pinande ertre, ana ye kanwakai yomara suna igle na moglka. <sup>11</sup> Na ka i ene diteinga, yeglpren na gun yeinga i ene mina suna yenambuka, ana ene yegl erimara ipre, gun pond kaima yenaglkwa. <sup>12</sup> Na lona i yegl pangwa, ene suwara suwarandi angro ta kan wakai yenaglkwa. Na ene wakai kanimere kuno yegl. <sup>13</sup> Ana yomba ta ye

yombama tau pre kan wakai kaima yeinan, ana ye pra yombama ipre kor-moglkwa i kondo gogl tenambuka. I ye pamere orkwa. <sup>14</sup> Ba na kongun eriyo diteinga i erimbi, ana ene na angrima kaima moraglkwa. <sup>15</sup> Na ene pre nigl-kongun yomba we ta dikrika, sraglpre nigl-kongun yomba ye kongun sugl moglkwa yagle kongun eremoglkwa i ye kankrikwa. Ba na ene pre yeineinga we dinga, sraglpre, na Nina ka kanekane dungwa pirka i ene dite kondingo. <sup>16</sup> Ana ene na pinde ikrikwa, na ene pinde indre ana kere i-pere endinga i ene pindre ana mongo merkinde koraglkwa, i mongo kaneta aimande kogl panambuka. Ana ene yegl ere na kangina mina ene taragl ta inamunedi Nina krapogl tembi, ye ene tenambuka. <sup>17</sup> Ana na lona i yegl pangwa, enene mina angro kanwakai yeiyo.

*Yomba eremogl disaipel wagle dikinde yenaglkwa*

<sup>18</sup> “Makandle yomba ye ene dikinde yembi, ene piraglkwa ye komnaiye na kankinde yembi <sup>19</sup> ene makandle yomba meglmbi, ana makandle yomba yene yombano mereyegl ene kanwakai yenaglkwa. Ba na makandle igle ene pinde i-kondinga pre ene makandle yomba moglkrikwa. Yeglpre makandle yomba kankinde yei ene teingwa. <sup>20</sup> Na ka diteinga ikra ene piryo: ‘Kongun yoko orkwa yomba ta mogl-mitna ende suglmo yomba engre tekrukwa.’<sup>☆</sup> Ye na eresi tembi, ye ombugl ene eresi tenaglkwa, ye na kannan pinande erimbi ye ombugl ene kanno pinande eraglkwa. <sup>21</sup> Ye taragl yegl pra ere ene

---

☆ 15:20: Jon 13:16

tenaglƙwa, sraglpre ene na yombana meglƙwa, yeglpre na diendungo wingwa yagle i ye ta pirkan erekriƙwa. <sup>22</sup> Na okuna kana ta ukre ana ka i ta ditekriya ye tandaglmeno ta paikruko. Ba erme ye tandaglmeno uglmange erekraglƙwa. <sup>23</sup> Yomba ta na kanwakai yei narekrukwa i ye ama Nina kanwakai yeitekrukwa. <sup>24</sup> Ba yomba ta okuna kana wu kongun giglendi erekrimere yegl na ye mina pukamugl mogl ana kongun giglendi i ta erekriya, ana ye tandaglmeno pre angai goglkraglƙwa. Ba erme ye kimagl na erika i prapra kandre ana kunda ikine ere na nare ama Nina kunda ikine ere teingwa. <sup>25</sup> Ba ye yegl erikwa i lono mina muno beglko pangwa i paiyungwa. Ka i yegl, ‘Ye mambuno paikrumara kunda ikine yoko ere narikwa.’<sup>☆</sup>

<sup>26</sup> “Spirit ene akepledi tenambuka, ye Nina bogl moglƙwa ana na ye diendimbo ene mina unambuka. Ye ka kaima dungwa Spirit, ana Nina bogl moglƙwa. Ye undre ana na embriyena ya konguna i dipene endinambuka. <sup>27</sup> Ana ene ama na pre ka dipene endinaglƙwa. Sraglpre, na kongun mambuno ere erika enge ene na bogl mogl wu erme wingwa.

## 16

<sup>1</sup> “Ene pirngi dingwa gugl sikrambuka pre, na ka i di ene teinga. <sup>2</sup> Ye makai yungu mina ene simenda ende, te okuwo enge ta unan yomba ene sigogltre, ana ye God kongunmo wakai ere tomunedi piraglƙwa. <sup>3</sup> Ye na Nina pre pirpogl sikre

☆ 15:25: Buk Song 35:19; 69:4

te na ama pirpogl sikrikwa, ipre ye mambuno yegl eraglkwa. <sup>4</sup> Ba na ka i okuna ene diteinga, ipre ye taragl yeglmere eraglkwa engemo i ta plau dinan ana na ka diteinga i ene poglodi piraglkwa. Na okuna ene bogl moglka pre taragl yeglmere ene ta ditekrikra.

*Holi Spirit kongunmo erambere pre Yesus dungwa*

<sup>5</sup> “Na erme diendungo winga yagle moglmara endinaglka, i ene suwarata na krapogl nare, ‘Ende aglo enatne?’ ta dikrikwa. <sup>6</sup> Na ka i erme diteinga pre ene nomano yumbun pond dongwa. <sup>7</sup> Ba na ka kaima ene diteinga, ene wu wakai enaglkwa pre na endinaglka. Na ende pikrimbo ana ene akeple dinambuka i ta ukrambuka. Ba na ende imbo ana ye di ene mina endinaglka. <sup>8</sup> Ana ye unambuka enge, makandle yomba tandaglmeno erikwa ombuno dindre te mambuno du-wakai ombuno dindre ana God ka-tange tenambuka mambuno i i-pene endinambuka. <sup>9</sup> Ye aglau ere ana tandaglme erikwa, sraglpre ye na wedi pirngi dikrikwa. <sup>10</sup> Mambuno du-wakai i yegl, na ende Nina moglmara eimbo ana ene enge olto na kankraglkwa.\* <sup>11</sup> Ana ye ka-tange tenambuka mambuno i yegl, makandle igle sugl moglkwa

---

\* **16:10:** Makandle yomba eremogl Yesus kot erete ana mambuno kinde orkwa pre gorambe dingwa. Ba God eremogl Yesus ikor ende auro yend ongo ana God bogl moglkwa. God mambuno yegl ormara i ombunodi makan yomba tongwa i Yesus aglau ta erekrukwa.

yomba komnaiye kana God ka-tange tongo ye yange sungwa.†

<sup>12</sup> “Na ka merkinde pangwa ene ditenaglka, ba erme ka merkinde i ene dimbo pir-inaglkwa kuno erekrukwa. <sup>13</sup> Ba ka kaima dungwa Spirit i undre ene nomano wakai tendre ana ye ene auro ipi ka kaima mina suna enambuka. Ye yene prumere ka ta dikrambuka, ye God kamo prukwa i keunde dindre, ana taragl okuwo plau dinambuka i pre di ene tenambuka. <sup>14</sup> Na kangina kande ya yombura wu pene enambuka pre, na ka dinga i ye indre ana ene ditenambuka. <sup>15</sup> Taragl prapra Nina mina yongwa i na taratna yongwa. Ipre na yegl dinga, na ka di Spirit teimbo ye indre ana ene ditenambuka.

*Disaipel wagle kinde pirtre ana okuwo wakai pirkwa*

<sup>16</sup> “Enge sungunagle ta ene na kankraglkwa, ana okuwo enge sungunagle ta ene aglike na kanaglkwa.”

<sup>17</sup> Ye disaipelma tau ye yene krapogl imboriya endingwa, “Ye ka dungwa i mambuno sraglmere pame? Ye yegl di norkwa, ‘Enge sungunagle ta ene na kankraglkwa, ana okuwo enge sungunagle ta na aglike kanaglkwa. Te ye ombugl yegl dungwa, na ende Nina moglmara enaglka?’ ” <sup>18</sup> Ye ama krapeglkwa, “ ‘Enge sungunagle’ i mambuno

---

† **16:11:** Makandle yomba kanigwa Yesus gogloko ana ye eremogl Yesus kot eran manambedi pirkwa. Ba God ongumuglo wagle Yesus kot ere kuno orkwa. Yesus goglmara i God kot ere Satan tendre ana yombuglomo sidundungwa.



sraglpre dume? Ye sraglpre ka dungwa i nono ta pirpogl sikunga.”

<sup>19</sup> Yesus pirkan orkwa disaipelma wagle krapogl tenamnedi pirko, ana ye ditongwa, “Na yegl dinga, ‘Enge sungunagle ta ene na kankraglkwa, ana okuwo enge sungunagle ta na kanaglkwa.’ Ka ipre enene mina krapogl di imboriya endim kana? <sup>20</sup> Na ka kaima ene diteinga, ene kai pond ere te munduno kinde piraglkwa, ba makandle yomba gun yenaglkwa, te ene kinde piraglkwa, ba ene kinde piraglkwa yake tenan ana gun pond yenaglkwa. <sup>21</sup> Ana ambu ta gak kugl yenambuka engemo magl ungo ana ye kinde prukwa, sraglpre giu gorambuka engemo yongwa, ba ye gak kugl yendre ana nangiye giugl ta pirkrukwa. Ye gun yongwa, sraglpre, gak kembra makandle wu pene ongwa. <sup>22</sup> Kuno yeglmere ene mina panambuka, erme ene kinde pirkwa, ba na aglkekor ene kanimbo, ana ene gun pond kaima yenaglkwa. Ana ene gun yenaglkwa i yomba ta ikorugl endekraglkwa. <sup>23</sup> Ana engemo igle ene taragl ta pre na kra ta poglkraglkwa. Na ka kaima ene di teinga: Ene taragl ta inamunedi pre na kangina mina Nina krapogl tembi, ana ye ene tenambuka. <sup>24</sup> Okuna yei ende wu etne ungwa i ene taragl ta inamunedi na kangina mina krapoglkrikura, ene krapeglmibi ana indre ene gun yenaglkwa, i ene mina kausi panambuka.

*Makan mina Yesus kunda yombuglo orkwa*

<sup>25</sup> “Okuna na ka pandum keunde dite wingra, ba enge ta yenan na ka pandum ta dikraglka. Ba okuwo na Nina pre ka nongugl mongo bogl ene

ditenaglka. <sup>26</sup> Enge i plau dinan ene na kangina dagltre ana Nina kraporaglkwa. Ene dinaglmere na Nina krapogl tenagle ta dikrika. <sup>27</sup> Taman, Nina yene ene pre munduwo pangwa, sraglpre ene na pre munduno pango, te na God mina umedi pirngi dingwa. <sup>28</sup> Na Nina mina mogltre ana ende makan mina winga, ana erme na makan mina kondo, ende ikine Nina moglmara enaglka.”

<sup>29</sup> Ana disaipelma wagle di Yesus teingwa, “Erme ene ka pandum ta dikitnga, ka nongugl mongo bogl dinga. <sup>30</sup> Erme no kamga, ene taragl prapra pirpogl singa, ana yomba suwarata krapogl ene tekrikwa. Ye poglodi pirkwa i ene kankondinga, yegl etnara i no pirngi dumga, ene God moglmara mogltre unga.”

<sup>31</sup> Yesus yegl di ikine endungwa, “Ene erme pirngi dimo? <sup>32</sup> Ba enge ta unambuka ikra wu kondungwa. Engemo igle ene teke wu perepere pindre ana ende enene yungunomugl enaglkwa. Na kondimbi mundu moraglka, ba nana mundu ta moglkraglka, Nina na bogl akiye mougllka.

<sup>33</sup> “Na taragl i prapra ene dite kondinga. Yeglpre na bogl akiye meglmbi ene nomano pokndi yenambuka. Makandle yomba ene yumbun tenaglkwa, ba ene andigl giglendi molo, na makan yomba yombutno i engre atne ende kondinga.”

## 17

### *Yesus ye yene pre kamange orkwa*

<sup>1</sup> Yesus ka i dite kondindre, mokomugl ye kan mitna ende ana kamange orkwa: “Nina, enge

ikra magl orkwa. Etne Wan kangiye kande i-pene ende temin, ana Wan ama ene kangin kande i-pene ende tenambuka. <sup>2</sup> Ene yombutn ye tenga pre, makan yomba koglkoglo meglkwa i ye sutno morambuka, yegl ertre ana yomba ene di ye mina endinga i keunde, ye kor aimande moraglkwa i tenambuka. <sup>3</sup> Ana kor aimande moraglkwa i mambuno yegl pangwa. Yomba pirpogl sinaglkwa, i God kaima ene suwara motnga, te ye ama Yesus Krai kanpogl sinaglkwa, ye ene diendinga ungwa. <sup>4</sup> Ene yombutn na ombuno dingo makan yomba kan-kondingwa, te na kongun ero dinatnere ikra pra ere kondinga. <sup>5</sup> Nina, okuna dumo makan plau dikrukwa enge na ene bogl akiye mouglka, ana na kangina kande pangwa. Ana kangina kande ikra erme aglke nare ikine endimin ana na ene bogl akiye morambuglka.

*Yesus ye disaipelma pre kamange orkwa*

<sup>6</sup> “Makandle yomba tau na natnga ikra yombamo ene kangin dipene ende ombunodi teinga. Ye ene yombanma meglko ana ye na narekondinga, ana ka i ye pirngi dindre pinande erikwa. <sup>7</sup> Ana taragl prapra na natnga ikra ye pirkan erikwa i ene mina ungwa. <sup>8</sup> Sraglpre, ene ka dinatnga i ye diteingo ana ye pir i-kondingwa. Na ene mina winga i ye pirkwa, ka i ka kaima pangwa, ana na diendingo winga i ye pirngi dingwa. <sup>9</sup> Na ye pre kamange ere teinga. Makandle yomba prapra pre na kamange eretekrika, ba yomba ene natnga i keunde pre kamange ereteinga, sraglpre ye

ene yombanma meglkwa. <sup>10</sup> Na yombanma i prapra ene yombanma, te ene yombanma i prapra na yombanma, ana na ambuglangena kande i ye mina wu pene ongwa. <sup>11</sup> Na erme ende ene motnara unaglka, na makandle igle wakane ta wanmoglkraglka, ba ye makandle moraglkwa. Nina, ene tandaglme paikrukwa kangin yombuglo pangwa i mina ye sugl wakai mogl tenatnga, ene kangin i na mina pangwa, ipre ene ya na suwara mouglere yegl ye ama wu suwara pi moraglkwa. <sup>12</sup> Ana na ye bogl moglka enge, ene kangin natnga i mina ye wau bogl dinaglmedi sutno wakai moglka, te ye ama wu korugl pikrikwa, ba yomba suwarata wu korugl pindre erekinde erambuka, i kamambuno pepa mina okuna muno beglko pamere kaima pai ingwa.

<sup>13</sup> “Na erme ende ene motnara unaglka, ba na makandle mogltre ka i prapra di ye tekondinga te na wakaina i ye mina suna kausi panambuka. <sup>14</sup> Ene ka dinere i na di ye tekondiga. Sraglpre ye makandle igle yomba ta moglkrikwa, te na ama makandle yomba ta manga. Ba makandle yomba ka i kinde pir mokono teingwa. <sup>15</sup> Na kamange erika i ene makandle igle ye ikorugl endo dikrika. Ba yomba kinde mina ene sutno wakai moratnedi pre na kamange erika. <sup>16</sup> Ye makandle igle yomba ta moglkrikwa, te na ama makandle igle yomba ta moglkrika. <sup>17</sup> Ene ka kaima mina etn yomba wu holi enaglkwa, ene ka dinga i ka kaima. <sup>18</sup> Ene na diendinga makandle wimere yegl ana na ye di-endimbo endpi dumo makan koglkoglo enaglkwa.

19 Ana ye pre nana wu holi enaglka, ye ama kuno yegl wu holi eingwa.

*Pirngi dingwa yomba prapra pre Yesus kamange orkwa*

20 “Na kamange erika i disaipel keunde pre ta manga. Ye kamambuno dimbi kade yomba pirtre na wedi pirngi dinaglkwa ipre na akiye kamange erika. 21 Ye prapra nomano suwara panan moraglkwa, i yeglmere. Nina, ene na mina motngo na ene mina moglka. Te ye ama nono mina meglmbi kade ana ene diendingo na winga i makandle yomba prapra pirngi dinaglkwa. 22 Ene ambuglangen na natnga ikra na ye teinga, i nono nomano suwara yei mouglere yegl ana ye nomano suwara yei moraglkwa. 23 Na ye mina moglko ana ene na mina motnga. Ana ye nomano suwara kaima panambuka, yegl erimbi kade makan yomba kandre ana ene diendingo na winga i ye pirpogl sinaglkwa, ene ye kanwakai yenga i na kanwakai yei natnere kuno yegl.

24 “Nina, yomba na natnga i keunde na moraglmara igle mogltre ana ye na ambuglangena i kanaglkwa, te ambuglangemo i ene na natnga, sraglpre kamkua ya makan ere yeikre ene okuna kana na kanwakai yenga.

25 “Nina ene du-wakai kaima motnga, makan yomba ene pre pirpogl sikrikwa, ba na ene pirkan eriko te yomba na bogl meglkwa i ye pirkan erikwa, ene na diendingo winga. 26 Na ene kangin ye mina dipene endingo ye pirpogl singwa, te na dimere yegl dimogl eimbo ana na wakai kanga

mambuno ikra ye mina panan kade ye yomba tau kanwakai yembi ana na ye mina moraglka.”

## 18

*Yesus sikane singwa*

*(Matyu 26:47-56; Mak 14:43-50; Luk 22:47-53)*

<sup>1</sup> Yesus kamange erekondungo, ana okuwo ye disaipelma wagle bogl endpi Kitrong nigl koglo imbo eingwa. Dumo igle ende olip yaglko moglmara ana ye disaipelma wagle bogl ende suna igle eingwa.

<sup>2</sup> Ana Judas eremogl Yesus imenda ende kunda ikine tenambuka yagle angai i pirkan orkwa, sraglpre dumo igle Yesus disaipelma bogl makaisi-si erikwa. <sup>3</sup> Ana Judas eremogl kimbirnem ya te pris kande wagle konguno yomba ya te Parisi wagle tau auro yungo ana ye ken gagl indre te kunda taragl ama ake indre ana Yesus pre doko eingwa.

<sup>4</sup> Yesus yene mina taragl prapra plau dinam-buka i pirtre, ana ye ende okuna undre krapogl tongwa, “Ene ira pre dokime?”

<sup>5</sup> Ye di ikine endingwa, “Yesus Nasaret nem.”

Ana Yesus dungwa, “I na moglka iwe.” Ana Judas ipi kunda ikine tenambuka yagle ye akiye igle andigl meglkwa. <sup>6</sup> Ana Yesus yegl ditongwa, “I na moglka iwe” dungo, ana ye mokonokra pi yangesi pai eingwa.

<sup>7</sup> Yesus aglkekor krapoglkwa, “Ene ira kan ina pre dokime?”

Ana ye dingwa, “Yesus Nasaret nem.”

<sup>8</sup> Ana Yesus di ikine endungwa, “Na ene diteingra, i na moglka iwe, ba ene na pre dokimbi prawa, yagl wagle tau i kondimbi ende piyondo.”

<sup>9</sup> Ye ka yegl dungwa i okuna kana ka dungwa ikra paiyungwa, “Nina ene yomba na natnga i ye suwarata wau boglkraglka.”<sup>☆</sup>

<sup>10</sup> Ana Saimon Pita dikumba prak gundo indre pris kande kongunmo yomba ta kina wokra simbiglkidi endungwa. Nigl-kongun yagl i kangiyee Malkus.

<sup>11</sup> Yesus di Pita tongwa, “Dikumba prak towo mina ende ikine endo. Ene pitnga Nina geu nigl minge narkwa i na nekraglka pre etno?”

*Yesus sikanesi ipi Anas moglmara eingwa*

<sup>12</sup> Kimbirnem sutno kande moglkwa yagle ye kimbirmonem yeingo te Juda kimbirnem yeingo ana ye wu suwara pi Yesus sikane sindre, <sup>13</sup> ana komnaiye kana Yesus yendpi Anas moglmara eingwa. Anas ambuglo wiye Kaiapas moglkwa, ana buglayungu igle mina Kaiapas ye pris kande moglkwa. <sup>14</sup> Ana ye ka wakai yegl di Juda yomba yegl tongura, “Yomba suwarata gogl ana yomba prapra akeple dinambuka i wakai kaima pangwa.”

*Pita eremogl Yesus kankrika we dungwa*

*(Matyu 26:69-70; Mak 14:66-68; Luk 22:55-57)*

<sup>15</sup> Yesus kanesi yend eimara Pita yongo disaipel ta bogl ye mokomugl embrika, ana pris kande ye disaipel ta i pirkan orkwa pre, ana Yesus yendpi pris kande toglmo suna eimara disaipel i mokomugl ana ende suna ongwa. <sup>16</sup> Ba Pita ye togl

---

<sup>☆</sup> 18:9: Jon 6:39

dra mendakra moglkwa. Ana disaipel ta pris kande pirkan orkwa ikra, ye ende ikine wu ambai dua sugl moglkwa i ditongo, ye yungu dra yauro endungo, ana Pita auro yend togl suna ongwa.

<sup>17</sup> Ambai yungu dra sugl moglkwa ikra krapogl Pita tongwa, “Ene ye disaipelmo ta motn kana?”

Ana Pita di ikine endungwa, “Na ta manga.”

<sup>18</sup> Ana endi gaiglko depamara igle kongun yomba ya te kimbirnem ye bi gogltre ana endi pir meglkwa. Te Pita ama meglmara igle akiye andigl mogl endi pir moglkwa.

*Pris kande kot ere Yesus tongwa*

*(Matyu 26:59-66; Mak 14:55-64; Luk 22:66-71)*

<sup>19</sup> Yesus disaipelma ya te yomba ka beke tongwa ikra pre ana pris kande krapogl tongwa.

<sup>20</sup> Ana Yesus di ikine endungwa, “Na ka pene keunde di yomba prapra teinga, i makai yungu yomara prapra ya te God holi yungumo mina na ka beke te-te erika, igle Juda yomba prapra wu makaisi-si erimara. Na uglmange ere ka ta beke tekrika. <sup>21</sup> Ene sraglpre na krapogl natn? Na ka dinga pirkwa yomba i ene krapogl to. Na ka sragl wedi ye teinga i ene krapogl pro, na ka dinga i ye pirkan erikwa.”

<sup>22</sup> Ana Yesus ka yegl dungo, kimbirnem igle meglkwa suwarata Yesus atndang sindre ana yegl dungwa, “Ene ka yegl sraglpre di pris kande tene?”

<sup>23</sup> Ana Yesus di ikine ende tongwa, “Ba na ka dinga i aglau ere dinga panan, ana yomba magl meglmara i sragl ka dinga aglau erambuka i ene



dipene endo. Ba na ka kaima dinga panan, ene sraglpre na sine?”

<sup>24</sup> Yesus ongo kane keglkwa i paimoglko ana Anas diendungo ye ende pi Kaiapas pris kande moglmara ongwa.

*Pita aglke Yesus kankrika we dungwa*

*(Matyu 26:71-75; Mak 14:69-72; Luk 22:58-62)*

<sup>25</sup> Endi gaglmara igle Pita andigl endi pir moglko, ana yomba tau yegl di ye teingwa, “Ene ombugl yagl i disaipelmo ta motngra iwe?”

Ba Pita ditorwa ere yegl dungwa, “Taman, na ta manga.”

<sup>26</sup> Ana pris kande kongunmo yomba ta, kom-naiye Pita eremogl kina goglum diendungwa ikra, yombamo ta ka muglkumdi dungwa, “Ene ye bogl endi olip yaglko moglmara igle miurko na kankrisino?” <sup>27</sup> Pita kordagl yegl dungwa, “Taman” dungo, ana konduwagle kumugl wi sungwa.

*Yesus ipi Pailat moglmara eingwa*

*(Matyu 27:1-2; 27:11-14; Mak 15:1-5; Luk 23:1-5)*

<sup>28</sup> Tangina kinde kana Kaiapas yungumo mina kondo Yesus yendpi gawana yungumo mina eingwa. Ana Juda yagl kande wagle ende Pailat angaimo suna igle pikrikwa. Sraglpre ye pirkwa, no suna omun ana God ongumuglo mina no sideglmbi yenan kade ana Pasova kaiya mokna i nekramga, yeglpre ye ende angai suna igle

pikrikwa.\* 29 Yegl eriko ana Pailat ende menda ye meglmara pindre ana krapogl tongwa, “Yagl i sragl orko ene ka-tange tenamnedi erime?”

30 Ye ka mongo yegl di ikine endingwa, “Yagl i mambuno kinde ta erekruma dagl no auro i ene motnara ta ukramga.”

31 Ana Pailat di ye tongwa, “Enene ye indre lono ta panambere ka-tange teiyo.”†

Ana Juda wagle di ikine endingwa, “No lono mina yomba ta sigolo dikrukwa.” 32 Taragl plau dungwa i okuna kana Yesus sraglmere ere gorambere pre dipanduglmara i kaima paiyungwa.

33 Pailat ende ikine gavana yungumo i yungugl pindre ana Yesus aglendi indre ye krapogl tongwa, “Ene Juda yomba kingno motno?”

34 Yesus di ikine endungwa, “Ene ka krapotnga i enene pitnere dino mo yomba ta na pre diteme?”

35 Pailat di ikine endungwa, “Ene pitnga na Juda yomba ta mogl kana? I enene yombanma ya te pris kande wagle ye ene iyu na narikwa. Ene sragl etne di?”

36 Yesus di ikine endungwa, “Na kingdomna i makandle igle ta manga. Na kingdomna i makandle igle yenan, ana konguna yomba kunda erimbi kade na tekoglo Juda yomba kande wagle ta

---

\* **18:28:** Gavana Pailat ye yombama wagle bogl ye God ongumuglo mina du wakai moramnedi mambuno erekrikwa. Ipre Juda yomba pirkwa bangeta yombamo i bogl bengane yei ana God ongumuglo mina deglmbi yei dinamunedi erikwa. † **18:31:** Rom yomba eremogl Juda makano sugl mogltre ana Juda yomba kotno mina ka tau akedu endiyo diteingwa, ba ene kotno mina yomba ta sigoraglme dikriyo diteingwa. Ana yomba endi-prak mina sigegl kwa mambuno i Rom yomba mambunono pangwa.

tekraglkwa. Taman. Ba na kingdomna i manginagle igle ta manga.”

<sup>37</sup> Yegl dungo Pailat krapogl tongwa, “Ene king ta motn kana?”

Ana Yesus di ikine endungwa, “Na king ta moglme dinga i kaima dinga. Na kugl yeingo ende makandle winga i taragl suwarata pre winga. I ka kaima dinaglka pre. Yomba ka kaima mina meglkwa ana na ka dinga i pirkwa.”

<sup>38</sup> Pailat krapoglkwa, “Ka kaima i sratne?” Ana okuwo Pailat ende ikine mendakra yomba meglmara pindre yegl ditongwa, “Ye mambunomo kinde ta panan na kan i-pene ende ana kot eretenaglka mere manga. <sup>39</sup> Ba ene mambunono yegl ta pangwa, Pasova yei-yei orkwa enge na kane paingwa yomba suwarandi dimenda ende-ende erika. Ana Juda yomba kingno i kane poko ende norambedi ene pirmo?”

<sup>40</sup> Ye mangre ka giglendi di ikine endingwa, “Ye ta manga! Barabas i-noro.” Ye kunogl gogl nendre te kigl kunda orkwa yagle.‡

## 19

*Pailat prawedi Yesus endi-prak mina siyo dungwa*

*(Matyu 27:15-31; Mak 15:6-20; Luk 23:13-25)*

<sup>1</sup> Pailat eremogl Yesus indre kumba sinaglkwa pre te menda endungwa. <sup>2</sup> Te kimbirnem kewan

---

‡ **18:40:** Erme pirpogl singwa yomba merkinde, Barabas pre yegl pirkwa, yomba epigl ta eremogl Rom yomba Juda kamun meglkwa i simenda endina pre kunda erimara i ye ama kunda ormedi pirkwa.

kangigle orkwa indre king bre gagl mereyegl bekindre ana bre mina pandigl teingwa. Te gagl suna olto gogl ta ende tendre, <sup>3</sup> ana ye moglmara undre yegl dingwa, “Mangra, Juda yomba kingno!” Ana ye ende magl pindre gumadra mina atndang singwa.\*

<sup>4</sup> Ana Pailat aglke ende menda pindre Juda yomba merkinde meglmara ditongwa, “Kaniyo na ye imenda ene meglmara endimbo kanaglkwa. Ye aglau ta eran panan na doko i-pene ende ana kot ere tenaglka manga.” <sup>5</sup> Ana Yesus kawan kangigle orkwa king bre gagl ya te gagl suna gogl olto ende teingwa i paimoglko ende menda ungwa. Ana Pailat di Juda yomba tongwa, “Kaniyo! Yagle moglkwa ya.”

<sup>6</sup> Ana pris kande wagle ya te God holi yungumo sugl meglkwa yomba Yesus kandre ye mangre kaglka dindre dingwa, “Endi-prak mina siyo! Endi-prak mina siyo!”

Ba Pailat di ikine endungwa, “Ene ye indre endi-prak mina siyo te na ye aglau ta eran panan doko i-pene ende kot ere tenaglka manga.”

<sup>7</sup> Juda yomba di ikine endingwa, “No lono ta pangwa, lo igle mina ye gorambuka, sraglpre ye okuna God Wam mole dungwa.”

<sup>8</sup> Ana Pailat ka i pirtre ye kundugl pond goglkwa. <sup>9</sup> Ye aglke ende ikine gavman yungumo mina pindre ana krapogl Yesus tongwa, “Ene kamun aglo nem?” Ba Yesus ka ta di ikine ende ye tekrukwa. <sup>10</sup> Ipre Pailat yegl di Yesus tongwa, “Sraglpre ene ka di ikine ende narekitne?”

---

\* **19:3:** Ka i Matyu 27:29 mina pangwa i kano.

Ene kane poko endinaglka mo endi-prak mina sinaglka i na pra eraglka kuno orkwa, i ene pirkitno?”

<sup>11</sup> Yesus di ikine endungwa, “God yombuglo ene ta tekran ana ene yombutn pai mitna ende na ta engrekratnga, ipre yomba ta na indre ene ongun mina yongwa i ye tandaglme kandekinde orkwa.”

<sup>12</sup> Pailat ka i pirtre ye konbauna ta doko kan indre ana Yesus kondimbo endinambedi prukwa. Ba Juda yomba kaglkane ere di ikine endingwa, “Ene yagl i kondimin endinan ana ene Sisa yombamo moglkitnga. Ana yomba ta ye yene king mole dinambuka i ye kunda ikine ere Sisa tongwa.”

<sup>13</sup> Pailat ka i pirtre ye Yesus imenda undre ana ye kot pir du di-di ormara boglmo mina amedi moglkwa. Ana boglmo i kangiye “Kombuglo bogl”. Te Aram kanno mina kangiye “Gabata”. <sup>14</sup> Ana ande kuiya 12 orko Juda yomba Pasova pre taragl akekun erikwa engemo yongwa.

Pailat ka di Juda yomba tongwa, “Kaniyo! Ene kingno moglkwa ya.”

<sup>15</sup> Ana Juda yomba ka muglkumdi di ikine endingwa, “Ye sigolo! Sigolo! Ye endi-prak mina siyo!”

Pailat krapogl ye tongwa, “Ene kingno i na endi-prak mina sinambedi pirmo?”

Ana pris kande wagle di ikine endingwa, “No kingno ta-ta moglkrikwa, Sisa suwara kaima moglkwa.”

<sup>16</sup> Ana Pailat eremogl Yesus tekoglo yomba onguno mina endungwa, i yomba yene endi-prak mina sinaglmedi pre tongwa.

*Yesus endi-prak mina singwa  
(Matyu 27:32-44; Mak 15:21-32; Luk 23:26-43)*

Ana kimbirnem wagle Yesus auro yend menda eingwa. <sup>17</sup> Ye ende menda undre, yene endimo-prak kake indre ana ende wu angai ta kangiye Bitno Yombuglo we dimara ongwa. (Ana Aram kanno mina kangiye “Golgota” we dingwa.) <sup>18</sup> Dumo igle Yesus endi-prak mina singwa. Te yomba suwo ama akiye endi-prak mina singwa, ye si endingo koglkoglo pambriko ana Yesus sunawom pangwa.

<sup>19</sup> Pailat ka muno ta bogl endi-prak mina panduglko pangwa. I yegl boglkwa, “Yesus ye Nasaret nem, ye Juda yomba kingno.” <sup>20</sup> Juda yomba merkinde ka boglkwa i kandre ye kerikwa. Sraglpre, Yesus endi-prak mina simara dumo i Jerusalem siti mangigl yongwa. Ka i Aram ya Latin te Grik mina muno boglkwa. <sup>21</sup> Juda pris kande wagle ka di Pailat teingwa, “ ‘Juda yomba kingno’ wedi boglkro.” Ba yegl boglo, ‘Yagl i yene Juda yomba kingno mole dungwa.’ ”

<sup>22</sup> Pailat di ikine endungwa, “Na ka muno bogl kondinga, i pra boglmere yegl panano.”

<sup>23</sup> Kimbirnem eremogl Yesus endi-prak mina sindre, ana okuwo ye Yesus gaglmo indre yumbusi bir 4 bogltre ana kimbirnem 4 ye bir suwarandi ingwa. Ana Yesus gaglmo olto atne endungwa i yei pangwa, gaglmo i alap kanekane indre simbeglkwa mereyegl ta manga, gagl alap i kane suwarata mundu erikwa.

<sup>24</sup> Ana kimbirnem yene di imboriya endungwa, “Nono gagl i ta ake argla dikramga, ba nono satu sumun kade yomba suwarata inambuka.”

Taragl yegl erikwa i okuna kamambuno pepa mina okuna muno beglkwa pamere mere mon-gomo paiyungwa.

“Na gatna suna olto ye

yene mina yumbusi indre ana

gatna olto ipre ira inambedi satu singwa.”<sup>✧</sup>

Ana kimbirnem wagle yegl erikwa.

<sup>25</sup> Yesus endi-prak mina pamara mangigl kaima ambu tau andigl meglkwa, Yesus mam te ye mam ambauglo, ana Maria ye Klopas embiye te Maria Makdala kamun mam. <sup>26</sup> Ana Yesus kangwa ye mam ya te disaipel ta wakai kangwa ikra akiye igle andigl miurka, ana Yesus di mam tongwa, “Yagl i ene wan.” <sup>27</sup> Te ama yegl di disaipel ikra tongwa, “Ambu i ene man.” Ana enge igle disaipel ikra Yesus mam Maria auro yend yungumo mina ongwa.

*Yesus goglkwa*

*(Matyu 27:45-56; Mak 15:33-41; Luk 23:44-49)*

<sup>28</sup> Yesus pirkan orkwa enge erme ye kongunmo prapra erekondungwa, orkwa i kamambuno pepa mina okuna muno beglko pamere mere wu giu dungwa, ye yegl dungwa, “Na nigl ninaglka orkwa.” <sup>29</sup> Dis ta igle yomara wain geu orkwa nuglo suna moglkwa, yomba ta giyagin mereyegl ta indre wain mina simbai ana endi isop buglo mina kansi pandigl, Yesus ninambedi ake imbo ye dra mina endingwa. <sup>30</sup> Yesus wain i nendre ana dungwa, “I pra dundungwa.” Okuwo ye nungo garwai dungo ana goglkwa.

---

✧ **19:24:** Buk Song 22:18

*Kimbirnem ta Yesus dangigle mina kuglange sungwa*

<sup>31</sup> Fraide enge yongwa i akekun erikwa engemo yongwa, ana tangina i Sabat enge kande ta yenambuka, i pre yomba geglkwa nangino briye i Sabat enge endi-prak mina pai moglkraglmedi Juda yomba manedi pirkwa. Ipre endi-prak mina paingwa i katno simbuko dindre te nangino briye i-atne endina pre ana Pailat prawe dinambedi ye krapogl teingwa. <sup>32</sup> Ana kimbirnem wagle pindre yagl suwo Yesus bogl akiye endi-prak mina paingwa ikra ye suwo katno simbuko dingwa. <sup>33</sup> Ye ama wu Yesus pamara kaningo ana ye gogl dundungwa pango, ye kagle simbuko dikrikwa. <sup>34</sup> Ana kimbirnem suwarata kuglange indre Yesus dangigle mina sungwa, ana oglandi yene kaima bormai ya te nigl toindi ende menda ungwa. <sup>35</sup> Ana yagl suwarata taragl erikwa i kangwa pre ye taragl erimere i dipene endungwa, ye kamo dungwa i kaima pangwa. Yene pirkan orkwa ye ka kaima dungwa. Yeglpre ene ama i pirngi dinaglkwa.† <sup>36</sup> Taragl yegl erikwa i ana God kamo pepa mina okuna beglkwa pangwa i kaima pai yungwa, “Ye yombuglomo suwara kaima ta simbuko dikraglkwa.”✧ <sup>37</sup> Ana kamambuno pepa mina ka ta ama yegl dungwa, “Dangigle mina sigungugl dingwa yaglmo ikra yomba prapra kanaglkwa.”✧

---

† **19:35:** Epigl i mina jon ka i yegl boglkwa, ‘Yagl suwarata taragl erikwa i kangwa.’ Jon yene nigl ya bormai toindungo kangwa. Jon 19:26-27 mina yegl dungwa, disaipel i endi-prak mina mangigl andigl moglkwa. ✧ **19:36:** Kisim Bek 12:46; Namba 9:12; Buk Song 34:20 ✧ **19:37:** Sekaraia 12:10



*Yesus nangiye maugl singwa  
(Matyu 27:57-61; Mak 15:42-47; Luk 23:50-56)*

<sup>38</sup> Enge i mokomugl, Josep, Arimatia kamun nem, ye Yesus nangiye i-atne endina pre krapogl Pailat tongo, ana Pailat prawe dungo, Josep pindre Yesus nangiye i-atne endungwa. (Ana ye Yesus disaipelmo ta moglkwa ba ye Juda yomba kundutno gogltre ana uglmange eremoglkwa.)  
<sup>39</sup> Nikodimas okuna kana Yesus moglmara enduwer ta pi kangwa yaglmo ikra ye Josep bogl embrika. Ana Nikodimas kungo demine orkwa i endi kane suwo nuglomo sikuglmagl ende ana ye yungo embrika, kungo demine orkwa i yum-bunmo 30 kilogram ongwa. <sup>40</sup> Yagl suwo i Yesus nangiye kungo eretendre te gagl alap were tembrika, i Juda yomba geglko maugl sinamnedi erimere yegl ye akekun erimbrika. <sup>41</sup> Yesus endi-prak mina simara dumo igle endi yaglkwa moglko, ana suna igle kombuglo dra yomba geglko pandiglmara kor ta waugl yeingwa, i yomba okuna ta geglkwa igle pandiglkrikwa. <sup>42</sup> Ba Juda yomba akekun eraglkwa engemo yongwa, sraglpre tangina i Sabat enge yenambuka. Ipre kombuglo dra mangigl wora yomara ana Yesus nangiye igle pandiurka.

## 20

*Yesus andigl ukor ongo kombuglo dra wau yongwa  
(Matyu 28:1-8; Mak 16:1-8; Luk 24:1-12)*

<sup>1</sup> Sande tangina kinde kana mim ere pango, Maria, Makdala kamun mam ende kombuglo dra pindre ana ye kangwa, kombuglo dra mina

kombuglo sigetdi pandiglkwa ikra egla pagl iyeglke endingwa. <sup>2</sup> Yegl kandre ana ye mukundi ende ikine pi Saimon Pita ya te disaipel ta Yesus wakai kangwa i miurara undre ana yegl dungwa, “Yomba eremogl Yaglkande kombuglo dra mina imenda endingwa pangwa, ba ipi aglokra yeingwa i no kankunga!”

<sup>3</sup> Yegl dungo Pita ya disaipel ta ikra, ye ende Yesus pandiglmara ena pre embrika. <sup>4</sup> Ye suwo-akiye muku dimbrika, ba disaipel ta ikra mukundi Pita i okuwo ende ana okuna kana pi kombuglo dra mina plau dungwa. <sup>5</sup> Ye goinge ere kan suna ende ana gagl alap tau were pandiglkwa ikra yeingo kangwa, ba ye ende kombuglo dra sunakra pikrukwa. <sup>6</sup> Te Saimon Pita okuwo ye mokomugl pindre ana du yene ende kombuglo dra mina suna pi ana gagl alap were pandiglkwa ikra igle yeingo kangwa. <sup>7</sup> Te gagl alap ta Yesus bre mina were pandiglkwa i gagl alap tau yeimara i yeikrukwa, ba gagl alap i yene pemasi pi eglke bangeta yongwa. <sup>8</sup> Ana okuwo disaipel ta komnaiye kana ongwa yagle ikra ama ende kombuglo dra mina suna ongwa. Ye i kandre ana pirngi dungwa. <sup>9</sup> Te Yesus gogl ana andigl ukor enambedi kamambuno pepa mina okuna beglko pangwa ikra ye pirpogl sikrikwa. <sup>10</sup> Ana disaipel suwo ikra ye ende ikine yungunomugl embrika.

*Yesus wu pene ongo Maria, Makdala kamun mam kangwa*

*(Matyu 28:9-10; Mak 16:9-11)*

<sup>11</sup> Maria ye kombuglo dra mendakra andigl kai eremoglkwa. Ye kai eremogltre ana si goindi kan

kombuglo dra yungugl kra endindre, <sup>12</sup> ana ye kangwa angelo suwo gagl kruwo ende pandigl tre, Yesus pandiglmara dumo igle kra amedi miurka, ta bre yomara dumomugl moglko te ta kagle yomara dumomugl moglkwa.

<sup>13</sup> Ye krapogl Maria tembrika, “Ambu ya, ene sragl orko pre kai etne?”

Maria di ikine endungwa, “Na Yaglkandena yend korugl eingwa, ana ye ipi aglokra pandiglkwa i na kankrika!” <sup>14</sup> Maria yegl dindre kan akete kango, ana Yesus igle andigl moglkwa, ba i Yesus moglmedi ye kanpogl sikrukwa.

<sup>15</sup> Ana Yesus krapogl Maria tongwa, “Ambu ya, ene sraglpre kai eremotne? Ene ira pre dokune?”

Ana Maria prukwa yagl i kongun ereyaglkwa yagl ta moglmedi pre, ye ka yegl dungwa, “Yagl kande, ene eremogl ye yend bangeta emin, ana ye ipi yenara dumo i dinatn ana na pi inaglka.”

<sup>16</sup> Yesus di ye tongwa, “Maria!”

Ana Maria kan akete Yesus moglmara ende ana Aram ka mina yegl dungwa, “Rabonai!” I mam-buno yegl, “Beke Notnga”.

<sup>17</sup> Ana Yesus di ikine endungwa, “Na nang-ina akekro, sraglpre na ende ikine imbo Nina moglmara pikrika. Ba ene ende na angrima meglmara iro pindre ana ye ditenatnga, na ende ikine imbo ye mina enaglka, ye na Nina te ama ene Neno moglkwa, ye na Godna mogltre ama ene Godno moglkwa.”

<sup>18</sup> Yegl dungo ana Maria, Makdala kamun mam, ende pindre ana ye Yesus kanyedi disaipel wagle ditendre te Yesus ka ditomere ikra boglo kugl tongwa.

*Yesus unongugl ongo disaipel wagle kanigwa  
(Matyu 28:16-20; Mak 16:14-18; Luk 24:36-49)*

<sup>19</sup> Sande enge i mim panagledi orko ana disaipel wagle ye Juda yomba kande wagle pre kundutno gogltre ana yungu dua prapra lok giglendi si pandigl yungugl ye makaisi meglkwa. Yegl ere meglko ana Yesus wu ye meglmara suna andigl mogltre ka yegl dungwa, “Nomano pokndungwa i ene mina yenano.” <sup>20</sup> Ye ka i di kondo okuwo, ye ongo koglkoglo ya te dangigle ombunodi disaipel wagle tongwa. Ana disaipel wagle Yaglkande kandre ye gun pond kaima yeingwa.

<sup>21</sup> Yesus aglke kordagl ditongwa, “Nomano pokndungwa ene mina yenano. Nina na di endumere yegl na ama kuno yegl ene diendinga.”

<sup>22</sup> Ye ka yegl dindre ana dra mur pudi yene disaipelma wagle meglmara endindre yegl dungwa, “Ene Holi Spirit iyo. <sup>23</sup> Ene yomba tandaglmemo kindekondo tembi ana tandaglmemo i dundinambuka. Te ene yomba tandaglmemo i kindekondo tekrimbi ana tandaglmemo i pai morambuka.”

*Yesus wu pene ongo Tomas kangwa*

<sup>24</sup> Disaipel wagle meglmara Yesus wu pendigl ongwa. Enge igle disaipel 12 mina suwarata akiye moglkrikwa, ye kangiye Tomas (kangiye ta Didi-mas)\*. <sup>25</sup> Ana disaipel tau ikra di Tomas teingwa, “No Yaglkande kamga!”

Ba Tomas di ikine endungwa, “Na nana ye ongo koglkoglo buglo-nil boglmara i kandre ana ake pirtre te dangigle mina kuglange boglmara i

---

\* **20:24:** Kangino Didimas we dingwa i mambuno yegl, “I mano enge suwarata pikagl yugl yongwa ikra ta moglkwa.”

onguna ende suna endimbo, ana na kaima pirngi dinaglka.”

<sup>26</sup> Sande suwarata ende wongo ana Yesus disaipelma wagle aglke kordagl yungugl meglkwa. Ana Tomas ye bogl akiye meglkwa. Te yungu dua prapra lok sikendingwa, ba Yesus wu ye meglmara pukamugl andigl mogltre ana dungwa, “Nomano pokndi ene mina panano.” <sup>27</sup> Te ye ama yegl di Tomas tongwa, “Ene ongun mongo magl ya yei ana na onguna kano, te ene ongun duglosi na dangra mina suna endo. Ene noman suwo yeikre ana pirngi kaima do!”

<sup>28</sup> Ana Tomas di ikine endungwa, “Na Yaglkandena te na Godna!”

<sup>29</sup> Yegl dungo, ana Yesus di Tomas tongwa, “Na kandre ene pirngi dinga. Ba na kankre pirngi dingwa yomba God eran ye gun yenaglkwa!”

### *Pepa boglkwa i mambunomo yegl pangwa*

<sup>30</sup> Yesus disaipelma wagle ongumutno-mugl ye kongun ya te kimagl kanekane ama orkwa. Ba i prapra pepa igle mina bogl atne endekrikwa.

<sup>31</sup> Ana ka ya te kongun tau orkwa i na boglka pangwa, i ene pirngi dinaglkwa. Yesus ye Mesaia, God Wam meglkwa. Ana ye wedi ene pirngi dimbi ana ye kangiye mina, kor aimande moraglkwa i inaglkwa.

## 21

*Disaipel wagle 7 meglmara Yesus wu pene ongo kanigwa*

<sup>1</sup> Okuwo, Yesus yene disaipelma wagle Taiberias Nigl numbun bina meglmara ye aglke

wu pene ongwa. Ye mambuno yeglmere ere plaudi-di orkwa. <sup>2</sup> Saimon Pita, te Tomas (i kangiyete ta Didimas) te Nataniel, ye Kena kamun Galili dumo kande suna nem, te Sebedi wam suwo ya te Yesus disaipelma suwo ama akiye meglkwa. <sup>3</sup> Saimon Pita yegl di disaipel tau tongwa, “Na fis ere sina ende einga iwe.” Ana ye dingwa, “No ene bogl akiye enamga.” Ana ye bot indre ende eingwa, ba enduwer enge olto igle ye fis kaima ta sikrikwa.

<sup>4</sup> Ana tangina kinde kana, Yesus nigle bina andigl moglkwa, ba disaipel wagle i Yesus moglmedi kanpogl sikrikwa.

<sup>5</sup> Yegl eriko Yesus di disaipelma wagle tongwa, “Kumugl wagle, ene fis ta simo?”

Ye di ikine endingwa, “Manga, ta sikunga.”

<sup>6</sup> Ana Yesus ditongwa, “Bot mina onguno wokra igle ene fis gagl nigle endiyo, yegl ere ene fis tau sinaglkwa.” Yegl dungo ana ye fis gagl ende nigle endingwa, ba gundo ikine bot mina endinaglkwa kuno erekrukwa, sraglpre ye fis merkinde kaima singwa.

<sup>7</sup> Yesus yene disaipelmo ta wakai kangwa ikra yegl di Pita tongwa, “I Yaglkande moglkwa!” Ana enge i Saimon Pita prukwa, Yaglkande we dungo, ye gaglmo suna olto gogl yongwa yendindre ana ye oglosi ende nigle ongwa. <sup>8</sup> Ana disaipel tau bot mina mogltre ye fis kausi meglkwa gagl i gundo indre ende bina ena pre wingwa. Ye mogl wimara i eglke ta yeikrukwa, ba 100 mita mereyegl. <sup>9</sup> Ye ende nigle bina okupole undre kanigwa endi gaiglo dongwa singre moglmara ana fis tau depango te bret tau ama yongwa.

<sup>10</sup> Yesus di disaipelma wagle tongwa, “Ene fis erme singwa i tau i-wiyo?”

<sup>11</sup> Saimon Pita puglonde ende bot mina pindre ana fis gagl gundo yend bina ungwa. Ana gagl mina fis kande 153 suna kausi meglkwa. Fis merkinde suna meglkwa ba gagl biglki dikrukwa.

<sup>12</sup> Yesus di disaipel wagle tongwa, “Ene wu neiyo.” Ba disaipel wagle yene mina suwarata yegl krapogl, “Ene irane?”, i ta dinaglkwa kuno erekrukwa. Sraglpre Yaglkande kaima moglko ye kanigwa. <sup>13</sup> Ana Yesus ende magl wu bret indre ana disaipel wagle tongwa, te fis indre ombugl kuno yegl orkwa. <sup>14</sup> Ye andigl ukor pindre ana okuwo disaipelma wagle meglmara aglkekor plau dungwa i erme enge suwota orkwa.

*Yesus di Pita tongwa, “Na sipsipna sugl moglo”*

<sup>15</sup> Ye kaiya mokna ne kondingo, Yesus di Saimon Pita tongwa, “Saimon, ene Jon wam, yomba tau na wakai kanigwa ba ene na pre mundun kaima kaima pamo?”

Saimon Pita di ikine endungwa, “Kaima, Yaglkande, ene pirkan etnga, na ene pre munduna kaima pangwa.”

Yesus di Pita tongwa, “Na sipsipna nangigle ene kaiya mokna to.”\*

<sup>16</sup> Ana Yesus aglke krapogl Pita tongwa, “Saimon, Jon wam, ene na pre mundun pond kaima pamo?”

---

\* **21:15:** Yesus kamo i yomba tau yegl yake teingwa, “Ene na bumbuno kaima gogltre ana taragl tau bumbuno goglkito?” Pita ka dungwa i yomba tau yegl yake teingwa, “Owo, Yaglkande, ene pitngra na ene yeineiga.”

Pita di ikine endungwa, “Kaima, Yaglkande, ene pirkan etnga, ene pre na munduna pangwa.”†

Ana Yesus di Saimon Pita tongwa, “Na sipsipna ene sugl wakai moglo.”

<sup>17</sup> Ana aglke kordagl Yesus krapoglko ana suwota orkwa, “Saimon Pita, Jon wam, ene na pre mundun pamo?”

Pita kinde prukwa, sraglpre Yesus ka kra enge suwota yegl pogl ye tongwa, “Pita, ene na pre mundun kaima pamo?” Ana Pita ditongwa, “Yaglkande ene taragl prapra pirkan etnga, ipre ene pirkan etnga, na ene pre munduna kaima pangwa.”‡

Yesus di Pita tongwa, “Na sipsipna ene sugl wakai moglo. <sup>18</sup> Na ka kaima ene diteinga, ene yagl gakmugl motnga enge, enene akekun ere kumagl de pandigl ana ta ena pitnara i ende enga, ba ene kindagl yenatnga enge ene ongun duglo simin yomba ta ene kumagl detendre ana dumo ta ene enakiratnara i auro yenaglkwa.” <sup>19</sup> Yesus ka yegl dungwa, i Pita sraglmere ere gogltre ana God kangiyekande tenambuka ipre dungwa. Ana okuwo Yesus di Pita tongwa, “Na wimara ene mokonamugl wo.”

### *Yesus disaipelmo suwarata wakai kangwa*

<sup>20</sup> Pita kan akete kangwa ana disaipel ta Yesus wakai kangwa ikra ye umbrara mokonomugl ungwa, yagle ye okuna Pasova neingwa enge ye

---

† **21:16:** Pita ka dungwa i yomba tau yegl yake teingwa, “Owo, Yaglkande, ene pitnara na ene yeineiga.” ‡ **21:17:** Yesus ka dungwa i yomba tau yegl yake teingwa, “Ene na yeineno?” Ana Pita ka dungwa i yegl yake teingwa, “Ene pitnga iwe, na ene yeineiga.”



Yesus moglmara piuriye mina tengete mogltre ana ka yegl dungura, “Yaglkande, yomba ira ene ipi kunda ikine tenambe?” <sup>21</sup> Pita yagl i kandre ana krapogl Yesus tongwa, “Yaglkande, yaglmo i sraglmere erambe?”

<sup>22</sup> Yesus ka mongo di ikine endungwa, “Ye kor-mogl panambedi na pirmbo ana ye mogl panan na ende ikine unaglka, i ene sragl kanen pam? Na enaglmara ene mokonamugl wo.” <sup>23</sup> Disaipel i goglkrambe dungwa, ka i waidi ende Yesus yombama tau meglmara ongwa. Ba Yesus ere-mogl disaipel i goglkrambiwo, yegl ta dikrukwa. Yesus yegl dungwa, “Ye kor-mogl panambedi na pirmbo ana ye mogl panan na ikine unaglka, i ene sragl wedi pitne?”

<sup>24</sup> Ana disaipelmo i keunde taragl prapra erikwa ipre ye dungwa, ana pepa igle mina ye yene taragl i prapra bogl atne endungwa. Ana no pirkan ounga ye ka dungwa i kaima pangwa.

### *Ka di uglo yongwa*

<sup>25</sup> Yesus taragl tau merkinde ama orkwa, sragl i suwara suwarandi pepa mina beglmbi, ana na pirka makan koglkoglo pepa boraglkwa i ta kuno eran ake i-wankraglkwa kuno erekrambuka.

**YESUS KAMO WAKAI**  
**The New Testament in the Kuman Language of Papua**  
**New Guinea**  
**Nupela Testamen long tokples Kuman long Niugini**

Copyright © 2008 The Bible Society of Papua New Guinea

© Faith Comes by Hearing

Language: Kuman

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2015-01-26

---

PDF generated using Haiola and XeLaTeX on 21 Feb 2024 from source files dated 31 Aug 2023

a58bffa6-7d79-5e34-b795-3b3ccc3f5137